

KOPI MO FAASAOSAOGA TALAFEAGAI A SUI USUFONO

ASO LULU, 24 IANUARI 2018

Na nofoia le Nofoa e le Fofoga Fetalai i le itula e 9:00 i le taeao.

Tatalo.

SAUNOAGA FAAFEILOAI A LE FOGO FETALAI

FOFOGA FETALAI: Ou te faasilasila atu ua amatalia Taulumaga ma Galuega a le Fono Aoaofaitulafono.

Ou te avea lenei avanoa ou te faatalofa ai i lau Afioga i le Palemia o le Taitai o le Maota le paia o le Kapeneta, ma le mamalu o sui usufono filifilia o le Palemene i ona Taitaifono, malo le soifua ma le lagi e mama i lenei taeao ua aumai e le Atua i lo outou soifua ma lo tatou ola e faatino ma faaaauai ai le tatou galuega.

Ia alo maia ia manuia faiva alofilima o lenei aso.

TUUIINA ATU O LIPOTI A KOMITI FAA-PALEMENE

Na tolaulau e le Failautusi le P.P. 2017/2018 Nu.134, Lipoti a le Komiti o Tupe Maua ma Tupe Totogi i le P.P. 2017/2018 Nu.67, Faamatalaga o Tupe a le Malo mo le Tausaga Faaletupe na faaiiina aso 30 Iuni 2016 e tusa ai ma T.T.52(5).

LAFO MO LE TOFIA O SUI USUFONO MO KOMITI FAA-PALEMENE

Tofa NAFOITOA TALAIMANU KETI (Sui Taitaifono o le Komisi Faa-Palemene): Lau Afioga i le Fofoga Fetalai, ua ese foi lenei taeao i le sui ai o le vaai, sui le faalogo, e faapena foi ona sui lagona ua oo mai. Ua maleifua mai i faguga lelei o sui usufono mamalu uma o le Palemene e faapea Samoa tapuai mai i maota ma laoa. Ua ae i manu faiva i faiga malologa i le pouliuli sa folau mai ai. A o le fesili lava i lenei taeao, o ai ea e afua ai ia mea, e afua ai ona maua le ola fou i lenei taeao? Sa i le amataga i le Upu, sa i le Atua le Upu, o le Atua foi le Upu. Sa ia te Ia le Ola, o le Ola foi, o le malamalama lea o le tagata. Faafetai i le Atua o le ola i lenei taeao.

Atonu o le ala lea o lou tulai nei o lou tu nei i Taumeasina ae tepa i Matagofie e pei o ia upu. Aua o lele ua maitau atu, ua sootuli ua mau tauee le maota i Tiafau nei.

Lau Afioga i le Nofoa, lau Afioga i le Fofoga Fetalai, e le alu loa. E tatau lava ona matou faafeiloai ma faatalofa atu i lau Afioga, malo le soifua, malo le lagi e mama, faafetai tele mo le tapenaina o le tatou taulaga molia i lenei taeao. A se i faafofoga le Atua foafoa, o le Atua tausii mea, e talosia ai feau ma galuega o le Maota i lenei aso. Faafetai tele.

E faafeiloai atu foi i lena itu o le malu, le afio o lau Afioga i le Taitai o le Maota, lau Afioga i le Alo o le Malietoa, lau Afioga i le Aloalii, lau Afioga i le Laau na Fausia, lau tofa i le Tamapunefu, lau Afioga i le Palemia i lenei taeao, malo le soifua, malo le folau.

E faafeiloai foi ma faatalofa i lau Afioga i le Sao Faapito, o lau Afioga i le Sui Palemia, e faapea le Aiga Minisita o le Kapeneta, Sui a Minisita, malo le tauatai, malo le soifua. E faatalofa i Taitaifono o Komiti Faa-Palemene e faapea sui usufono mamalu uma o Komiti eseese o le Maota, malo galulue, malo i lo outou fitaituga, ua faigofie ai tiute ma faiva o le Maota.

Ou te le alu loa foi e faatalofa atu i lima ma vae o le Palemene, le paia i Faauluuluga o Matagaluega a le Malo, Faauluuluga Tumaoti o Faalapotopotoga a le Malo o le Aufaipisinisi, malo galulue, malo le onosai.

E le galo foi Afia i lona vao i lenei taeao i lau Afioga i le Fofoga Fetalai, ae a le tapuaiga mamalu a Lana Afioga Mamalu, O Le Ao o le Malo ma le Masiofo, Sui o le Fono a Sui Tofia ma Masiofo. Malo tapuai, malo le popo o le fala, ua sao ma uli faiva o le Palemene i la outou tapuaiga. O Samoa o le atunuu tofi ua faailo i lenei taeao i le talosaga la outou tapuaiga, e matou te faafeiloai atu foi, faafetai tatalo ua manuia ai faiva o le Malo ma le Palemene.

O le paia o le Aufaigaluega galulue totofi a le Atua, e faapena foi sa matou talanoa atu i lenei taeao, malo tatalo mai. E tatou te galulue faatasi i a tatou Tulafono, o le Malo lava o le Ekalesia lena.

E faapitoaugafa sa matou faafeiloai ma faatalofa i lou itumalo pele a o maua ai le laolao ina ua tuu i tai le vaa o Matautu. Le paia aua le Aiga Sa Peseta ma lo latou Maopu oe le Tamafaasausau, le alaatai o le nofo Usoalii le nofo a ituaiga o le Faleiva, ma upu ia te oe Matautu, o le faamaluga o Malo. Ioe o oe o le Muaautasi, o oe o le Muaaufaalele, ma o oe foi o le Muaautau. Tapuai maia ua manuia faiva o la outou nofoa, ona o la outou tatalo o la outou pule lena. Ia foi i le Atua le viiga aua ne i ia i tatou i mea uma e tatou te faia.

Lau Afioga i le Fofoga Fetalai e tusa ai ma lo matou tulai, e tusa ai ma le Tulafono Tumaui 144, ou te faatu ai le lafo, *Ina ia faamaonia le tofia o le Susuga Hon LAAULI LEUATEA POLATAIVAO FOSSIE SCHMIDT i le Komiti o le Vaega o Atinae Eseese e sui tulaga i le Tofa Hon LOPAOO NATANIELU MUA.*

Faalua e le sui usufono mo Safata Sisifo ma le sui usufono mo Siumu.

Na faamaonia le lafo.

**TULAFONO TAU FAAOFI O LE FAATATAUINA O TUPE
FAAOPOPO (NU.1) 2017/2018 – felafolafoaiga i luga o le faitauga
faalua, faaauau mai le aso fono ananafi**

FOFOGA FETALAI: Ma e tolopo Taualumaga o le aso fono ananafi, o lo o saunoa le sui usufono mamalu mo Aana Alofi Nu.2.

Ma le faaaloalo ou te tapa ai lau Afioga i le sui usufono mamalu e faaaauu le saunoaga matagofie.

Tofa ILI SETEFANO TAATEO TAFILI (Aana Alofi Nu.2): Faafetai i lau Afioga i le Fofoga Fetalai mo lou avanoa. E manatu o lea ua maea ona momoli lapalapa o malo, sula foi le alofa ma le agalelei o le tatou Tapaau sili i le lagi i lenei taeao pei ona i ai le talosaga molia sa saunoa i ai lau Afioga i le Fofoga Fetalai, e faapea foi ona saunoa i ai le sa tuvaoina le tatou Fonotaga i lenei taeao, ae matou manatu lava e le fia faaitiitia le viiga o le Atua. O le Atua o manatu, o le Atua o Au, o le Atua o Malo, o le Atua lena e Ana le pule faasoa ua mafua ai ona ee mai i faguga lelei i lenei taeao le paia o le Palemene o Samoa.

Lau Afioga i le Taitai o le Malo lau Afioga i le Palemia, faapea foi le Sui Taitai, le Palemene ae tainane Minisita o le Kapeneta. Aua o ai na manatu o le a agalelei le Atua i le soifua i lenei taeao, a o lenei ua tatou feiloai i luma o nuu ona o Lona agalelei. Ia foi la le viiga i le Atua ua mafua ai ona tatou lauluafesilafai i lenei taeao.

Sa tolopo le tatou Fono i le aso ananafi o lo o faapea ona ou talanoa atu i le falemai faaitumalo i Leulumoega. Ona ou manatu lea o lea ua manino le mata i le vai i le faafofoga a le Minisita, faapea foi le Pulega i so matou vaivaiga sa avatu e uiga i le falemai lea. I le maitau atu i lenei vaitau i tulaga faaletonu o lo o i ai auala o le tatou Malo, e maitau pea ma maitau pea, o le toatuga lava o lo o tilotilo i ai le tele o aso, o le vai o lo o aafia ai o tatou auala, ia e le fai atua se faamatalaga o la e i ai le Afioga i le Minisita ma le Pulega le vaega e uiga i la lea tulaga.

E faamanatu atu i lau Afioga i le Minisita, o le auala i Leulumoega e alu agai i uta ai Faleaseela ma Lefaga, ia ua faapena ona tulaga faaletonu mai, ia ae le o po malae i le silafia o lenei foi itu auala o lo o tele ina faaaogaina e le mamalu o le atunuu e agai atu i le uafu i Mulifanua ma le malae vaalele i Faleolo faapena foi lena itulagi, ia se i silasila ane i ai lau Afioga i le Minisita ma le Pulega. E le gata i lea, ae na ona toe faamanatu atu i lau Afioga le auala galue o si ou itumalo e na o le tasi lava le auala galue e talosagaina, ina ne i faatauanaui ona avea lea ma se tulaga le matagofie, ae tuu atu i ou tafatafa.

Lau Afioga i le Minisita o Aoga, Taaloga ma Aganuu, e fia faailo le agaga o le faafetai, o se tasi foi o tulaga ua faapea ona laasia e le Ofisa o Aoga i le toe faafaigaluegaina lea o Asiasi Aoga e pei ona i ai foi i lenei vaitau. E ui lava ina e le i atoatoa lelei lenei faamoemoe ona o lo o i ai nisi o itumalo e le o i ai ni asiasi aoga, ia ae e ioe lava ma talitonu le faamoemoe o se galuega e le mafai ona faia i se tausaga se tasi. A o lo o i ina le uta a le faimea aua lau silasila mamao i la lea tulaga.

E le gata i lea, ia ua tatou i ai i le vaitau ua toe faaipoipo ulugalii ua leva ona tetea, pei o le fuafuaga faaalualu mamao a le Malo i le Matagaluega o le Soifua Maloloina. Ona matou manatu lea, pe le ua talafeagai lenei foi taimi ona toe tuueseese le Aoga o Matata Eeseese mai le Iunivesite pei ona i ai, aua o le upu moni lava ua maitauina lava le tulaga faaletonu o le Matata Eeseese e pei ona i ai, e pei ua pau lava le mamafa i aoaoga faale poto salalau, ia ae ua faatuatuanai le Matata Eeseese. Ae o i o lo o fofoa mai ai ia malosiaga o so o se atunuu tau atinae, tulaga tau aoga faamatata. Na ona tuu atu lava i tafatafa o lau Afioga i le Minisita o Aoga mo lea vaega.

Ua manatu e tele ma anoanoai ni lagona ma ni manatu e fia faaali i lenei taeao lau Afioga i le Fofoga Fetalai, ae ioe ma talitonu o lo o fofou mai nisi, ona matou manatu lea, o le a faamuta mai ai i i so matou lagona i lenei aso, atonu e toe maua se laolao i se taimi o lumanai.

Ae le tuufaapo evaga le tatou mafutaga, lau Afioga i le Taitai o le Malo lau Afioga i le Palemia, Sui Palemia ma le Kapeneta, faafetai mo galuega lelei sa faapena ona alo i ai i le tausaga ua tuanai atu, malo le galue, ia lenei ua fotuai mai lenei tausaga, ia sagai ane ai o le tai, ia faapena ona faamanuia le Atua i outou faiva alofilima aua se lelei ma se lumanai o Samoa mo a taeao. E faapena foi i lenei itu o le Maota, ia maua foi se finagalo i alii ma tamaitai sui usufono aua foi le pitolaau o lenei foi itu o le Maota.

E foi atu sa matou faamatalaga e le galo Afia i si vao, i le faafofoga tapuai a si ou itumalo o Aana Alofi Nu.2. Le paia lava lea aua le affio o Sooaemalelagi ma i laua na Faiga, le alaalatai o le Faleiva o le Faletuiaana, le Matuanatogi o le Faalanumaaveave ma upu ia te oe Leulumoega. Nofaalii i le afio o le Aiga Sa Tuala, o le Aiga Faalagilagi. Susu foi Tanuvasa na atoa i ai le itumalo, le mamalu ia te oe le Faleaana, ae tainane le Faleaana i Nanae ma lo Tapaau ia Tauti ma Malaitai. Faafetai mo lau tapuaiga, faafetai mo lau faasoa i la outou auauna ua mafua ai ona maua so matou manatu aua le Fonousu ma le Fonotoa a Samoa. E le gata i lea e le faagalo le Aufaitatalo i Faafeagaiga Taulagi o lo o faapena ona fai tatalo, ia a o alo la outou auauna i ona faiva.

Ia a o le i faamaea sa matou faamatalaga, ia e momoli atu moomooga alofa i lau Afioga i le Fofoga Fetalai, ia faapena ona alofagia e le Atua lou soifua, lenei foi tausaga ma le tau amatamata, ia i ai lona agalelei. Ia manuia le Fonousu ma le Fonotoa a Samoa, faafetai.

FOFOGA FETALAI: Malo, faafetai, malo saunoa malo foi fetalai faa-Tumua. Ia e le laeia e se upu a le Nofoa le vagana ia te oe Leulumoega, paia foi i le Faleaana ae ua manino auofala i lou finagalo, pau lea o le mea o le auala lea o le faleaoga lea o Nuuusala faamau ifo i lau Afioga i le Minisita o Galuega, ina ia faaleleia lona mea leaga o aoga lapopoa na o Kolisi o totonu o nuu ma itumalo.

Ia ma e tulai mai se isi sui usufono e fia saunoa. Ia tulai mai se tasi o toa mai Falealili le itu lea i Falealili Sisifo, fetalai ia Aumua. Tulai mai le sui usufono mamalu e saunoa.

Tofa AUMUA ISAIA LAMEKO (Falealili Sisifo): Lau Afioga i le Fofoga Fetalai, faafetai i lenei taeao mo lou avanoa.

Ua maea ona paepaeulufanua ma teuteu laufala upu o lo tatou aso lea ua afua ua taoto i ai le paia faale-Atua, ma le mamalu i le faleaganuu. Ua ta oaoa ai nei i Faleseu ae saa i maaomalie. Faafetai i le Atua ua taitaiina mai lo outou soifua ma so matou ola i lenei taeao.

E faatalofa atu i Lana Afioga Mamalu, O Le Ao o le Malo ma le Masiofo, faatalofa atu foi i Sui o le Fono a Sui Tofia ma o latou faletua, faatalofa atu foi i le Afioga i le Palemia ma le Kapeneta, faatalofa atu foi i le Afioga i le Faamasino Sili ma le Ofisa o le Faamasinoga, faatalofa atu foi i lau Afioga i le Fofoga Fetalai ma le mamalu o sui usufono a le Palemene, faatalofa atu foi i le afio o Faafeagaiga tau i le lagi, i so o se fatafaitaulaga o lo o latou tauasuina le Ipuvai o le Ola, e faatalofa atu foi i Faauluuluga o Pisinisi

Tumaoti, Matagaluega ma Faalapopotoga a le Malo, ae a ia saoa ma tamaitai ma le malosi o le nuu. O le paia lava lea aua Tama ma o latou Aiga, Aiga ma a latou Tama, Usoga a Tumua ma Pule, Ituau ma Alataua, Aiga i le Tai ma le Vaa o Fonoti. Susu foi Sua ma le Vaifanua, Fofu ma Aitulagi, Saole ma Saleaamua, Launiu na Saelua ma upu i le Manuatele.

E faatalofa atu foi isi ou itumalo i lenei taeao, e ui lava ina vaeluaina ia Falealili ia Sasae ma Sisifo, ae tasi lava lo ta aluga, tasi foi lo ta ieafu. Le paia ia Alaalagafa, la Lua nofo Tulafale, Tauagaeseese ia te oe Falealili. Faamalo tapuai, faamalo tatalo, ua aulia mai lenei taeao i le alofa ma le agalelei o le Atua.

E fia faia so matou manatu e faatatau i le Tala Faaopoopo o le Tupe, ia o le auga lava ma le faamoemoe ina ia mafai e le Malo ona faatinoina ana galuega ia ae le gata i lea o isi o a latou atinae. E mafai ona ou faamauina ia le alafua lea o lo o taitaiina e avea ma faiga faavae a le Malo, ina ia aua lava ne i sili ma le 3.5% pe a fuafua i le tamaoauga o a tatou tupe.

Ona oo lea o sau faamatalaga i le Matagaluega a le LTA, e talosaga ma le agaga faaaloalo i lau Afioga i le Minisita mo Galuega ma Atinae Eeseese, si o matou auala lea i le aoga tulagalua i Saleilua ma Poutasi, atonu lava i le amata i lenei Paeaiga sa tatalo atu ai mo sina fesoasoani, ina ia faapea ona sua ma tanuina. A faapea e le lava le tupe e faata ai, pau lava le mea ia mafai ona feoi ia tagata foi o si o matou nuu o Saleilua ma Poutasi i le faaaogaina o le auala i le tulagalua lea.

O le Minisita mo Tagata Tafafao Maimoa mai Fafu, e tatalo atu ma le agaga faaaloalo e tauala atu i lau Afioga ma le Matagaluega, i nofoaga o tagata tafafao maimoa ia e lua i Tafatafa, i Vaiula ma le auala lea e alu agai i le Brenda ma le mataaga o Taito, e manaomia le tanuina faamolemole. I le taimi lenei, atonu o tasi ia o mataaga o lo o faapena ona toatele le mamalu o le atunuu ae le gata i lea o tagata tafafao maimoa mai fafu o lo o faaaogaina, aepeitai o lo o fai lava sina faaletonu o le auala. E tatalo atu ai ma le agaga faaaloalo, ia ni a fa au na ona fia tanu lava, ina ia mafai ona faaoga. O lo o faaoga i le taimi lenei, ae ua faapena ona faaleagaina ona o le tele o timuga.

Na oo mai lea o sau faamatalaga i le Auaunaga o Tineimu, e momoli atu le agaga faafetai e tusa ai ma le tatou Call Centre lea ua faaaogaina o le 911, ua mafai ai ona faamauina ia faalavelave tutupu faafuasei. E le pei o le mea sa i ai, ia e galo foi lele i le toatele o tagata ia le numera e vili, ae lea ua manaia lea, ia e lagolago foi e lo matou itumalo le faaoga o le numera e tasi, aua ia faalavelave tutupu faafuasei.

Ona oo mai lea o sau faamatalaga i le Matagaluega o Pisinisi, Alamanuia ma Leipa, e talosagaina aua lea pei ona taua e le Tala o le Tupe, le tele o le vaegatupe lea ua faasafua mai lea sa totogi ai le lisi a le Yazaki, ia na ona faafesili atu lava i le tulaga, pe i ai se fesoasoani o lo o mafai ona ave i kamupani fou ia o le Sleep Well ma le FERRO e pei ona tatou i ai foi i le Yazaki mo le totogiina o le lisi?

Ia e le tuua faamatafauina sa matou faamatalaga, pau lea ia agalelei mai le Atua i lau Afioga i le Fofoga Fetalai i lenei aso, manuia le Fono.

FOFOGA FETALAI: Malo i le saunoaga a le sui usufono mamalu, ia o tama malamalama, aua e tasi lava le faitau, manino ma malamalama. Ia malo faafetai o le fetalai lava i le Ulumu ma Lefaoaseu ua se togi le seuga ua se laga i kila ua faapulou le kualima, ia malo le fai o le faiva malo lauga.

Ia o i ai se isi sui usufono e tulai mai. Ia e faitau atu o lea ua tulai mai le sui usufono mo Safata Sisifo, ia e lelei lava ona soosootauau mai ia le pito le ia felafaoi i luma i i. Saunoa le sui usufono mo Safata Sisifo, lau Afioga i le sui usufono mamalu.

Afioga LEAANA RONNIE POSINI (Safata Sisifo): Lau Afioga i le Fofoga Fetalai, e muamua foi ona faatalofa atu i lau Afioga, e faatalofa atu foi i le Taitai o le Malo, le Kapeneta ma Minisita Lagolago, e faatalofa foi i le Palemene o Samoa i lenei taeao. E talitonu foi e au foi le agaga ma le loto i le faafetai ua e siitia, ia o le talitonuga lava o le viiga lea e foi atu i le Atua. Ua maua foi le avanoa e faatalofa atu ai i le paia o le tapuaiga a Samoa, lau Susuga i Lana Afioga Mamalu, O Le Ao o le Malo ma lau Masiofo, Sui o le Fono a Sui Tofia. E faatalofa atu foi i Auauna a le Atua o lo o talaiina le finagalo o le Atua i totonu o le tatou atunuu, e faatalofa atu foi isi ou itumalo, e ui lava ina vaeluaina le itumalo, ia e le aveesea lava ia paia ma mamalu o le itumalo, le Falefa o le Ulugatanifa, faapea le Faauluuluga, Taulauniu ma le Aitutagata, ia faapea le nofo Tula ia Safata. Ae ou te talitonu o le a tau agai se manatu i le Tala Faaopoopo o le Tupe ua i luma nei i lumamea i totonu o le Palemene.

E muamua ona avatu se manatu i le Afioga i le Minisita mo Auaunaga o Tineimu, e talitonu lea e le i atoa se lua vaiaso talu le mu lea sa tulai mai i le Kolisi lea o Palalaua, ua matua faaleaogaina atoa ai ia le faleaoga. O lou manatu, ua talafeagai le faatu o se Tineimu i le itu lea i Saute o le motu lea o Upolu. A silasila foi lau Afioga, e mai i Lefaga, Safata, Siumu ma Falealili, ua tele faletalimalo o lo o tutu ai, e talitonu foi o se avanoa e tomanatu ai lo tatou Malo, ua tataua ona faatu se Tineimu i le va lea i Safata e latalata i Lefaga, Siumu ma Falealili. E talitonu o se mea ua alagataua ona faatu i ai se tatou ofisa. Aua o lau maitau, o le itu lea i Saute o Upolu, lea e mafuli i ai ia le fauina o faletalimalo, e tele foi faletalimalo o lo o i ai i le taimi nei, na ona tuu atu lava i lau Afioga i le Minisita.

Ona oo mai lea o se faamatalaga i le Minisita mo Galuega, Felauaiga ma Atinae Eeseese, ia o lena ua silafia e lau Afioga na oo atu foi lo matou nuu o Sataoa, e tatalo i lau Afioga i le Minisita, o le auala lea e alu i tai ma le auala lea e agai i uta, o le tele o aiga o lo o nonofo ai i itu ia. Ae silasila lau Afioga, a oo atu nei lau asiasiga, ua matua faaleaogaina lava le auala lenei. Masalo foi ua ova ma le 6 i le 7 tausaga e le i toe oo i ai se teuina o le auala lea, ua tafua uma lava le ta lea sa i ai. E tatalo atu i lau Afioga i le Minisita, se i e silasila ifo i ai mo le faataina o lea auala.

Ona oo mai lea i lo matou nuu lea o Nuusuatia faamolemole lau Afioga. E i ai le laina moli lea sa agai ai i uta i aiga ia i uta, e le i tau atu lava ia le laina moli lea a le eletise i nai o matou aiga o lo o i uta o lo o nofoia ia le nuu lea o Nuusuatia. E tatalo atu ai i lau Afioga, se i silasila i ai lau Afioga i le tulaga lea i le faaeletiseina o lo matou nuu lea o Nuusuatia.

Ona oo mai lea o sau tala lau Afioga, na ou sau i le isi aso ou tutu ma ou matamata i le alavai lea i le aoga lea a St. Marys i Savalalo, lau Afioga na ou tu ma ou matamata lea ai. Ou te masalo e le i atoa le lua tausaga na suatia i luga ia le auala lea, o le poloka ia o le auala lea. Na ou sau lea ou fesilisili i le konekarate, ae faapea mai le konekarate e omai e toe sui ia le alavai na i ai. Ae fai mai, o le tulaga foi lele vaeatu le paia o le Maota, ua faatumulia i le palapala. Na ou sau lea ou maitau i le taimi na sua ai le tai, toetiiti lava tumu

le alavai i le tai lea e sau mai le sami. I lau lea tau maitau, e pei e le i lelei le fuafuaina mai le amataga o le alavai lea e sau vaai e oo mai i uta i Savalalo le suatai lea e sau mai tai pe a sua le tai, e matua poloka lava, a oo la i taimi o timuga ia, ia ona lolovai lea. Ona ou fesili lea i le konekarate ae faapea mai, o lea o le a sui i ogapaipa lapopoa foi lea. A o lau maitau, e le mafai ona foia le faafitauli lea e i ai, e tumu lava i le palapala, vaeatu le paia o le Palemene. O lau maitau lau Afioga, e le ni tupe itiiti ia a le tatou Malo lea e...o lau foi lea maitau, o le isi lua tausaga pe le i atoa foi se lua tausaga ua toe eli foi le mea lea. E pei e foliga mai i lau maitau e le i lelei ona faatino mai i le amataga ma fuafua ia le tulaga e faataatia ai ia a tatou alavai ia. O le manumanuga pei o la matou tatalo atu i lau Afioga i le Minisita, ia o tatou auala aemaise o auala i tua, ia ae a faapea e maumau tatou tupe i le toe eli foi o mea ia, e le taugofie lau Afioga i le Minisita.

Ona oo mai lea i le Minisita mo le Soifua Maloloina, faafetai tele lava i lau Afioga i tulaga o...e ui lava ina e le i faatino ia le falemai faaitumalo o Safata, ua maitau atu o lea ua tele tausaga ua le aoga ia le falemai tuai sa i ai, ia ae i ai lava le talitonuga i lau Afioga, ia ua aumai le faatuatuaga i lau Afioga e faatu le falemai faaitumalo i le nuu lea o Saanapu, o le tulaga foi i le fanua lea o lo o fai ai le auunaga faa-soifuamaloloina e oo mai i le aso, ia o la ua malie mai le Afioga Anapu e faatu ai ia le tatou falemai, e talitonu foi, ia ua tatau ona faatino ia le falemai lea faaitumalo lea ua tele foi tausaga ia e le o i ai se falemai faaitumalo i si o matou itumalo.

Ona oo mai lea i lau Afioga i le Minisita mo Faatoaga ma Faigafaiva, faafetai tele lava i le tulaga foi o le talo ma tulaga o le atinae i le taumafaiga o le tatou talo. O i i lo matou itumalo, o le itumalo lea o matou i lau maitau, o le ola o le laau lea o le nonu la e i ai. Ou te masalo foi a i ai ia faamaumauga a le mea lea o le auvaega lea o le Kamupani lea e faia nonu, tatalo atu i lau Afioga e pei ua tau solomuli foi ia tagata o le itumalo e teu le nonu ona ua alu alu lava foi ma poloka le nonu ua le toe faia. E tatalo atu i lau Afioga, se i saili ifo ni nai maketi e ave i ai ia le tatou nonu, aua a sue i faamaumauga a kamupani ia, o le matou itumalo o le itumalo e tele ai le nonu. Ou te talitonu foi e faapea si o tatou atunuu, tasi lea o laau e tele ai lo tatou tamaoiga e ave i fafo le tatou nonu.

Ona oo mai lea i lau Afioga i le Minisita mo Aoga, Taaloga ma Aganuu. Faafetai tele lava i lau Afioga i le Minisita o Aoga, e tele suiga lelei ua faatino i le tulaga o aoaoga tulagalua, pei foi ona ou fai atu i le taimi ua sola, o i lava le fatu o le ola aoaoina o tatou fanau o le aoga tau amata lea, a o lea ua maitau i suiga ia ua i ai, faafetai tele lava i lau Afioga, aua e talitonu foi o le tumutumuga lea o le tatou Malo, tatou te silasila tulou a outou Afioga, o se mea ua tatau lava ona faatino, faatino loa, o lea e momoli atu ai le faafetai tele i lau Afioga. E pei foi ona taua e se Tootoo ua mavae le tulaga lea o le tuufaatasiga o le Iunivesite ma le aoga lea Matata Eeseese. Lau Afioga ou te tatalo i lau Afioga, sa tatau lava ona i ai se Komisi Suesue, lea ua ova ma le sefulutasi tausaga o tuufaatasia, aua sa i ai se Komisi Suesue e saili le tuufaatasiga lea, a o lau maitau leaga sa galue ai foi, e tele lava le suiga ou te talitonu ua tatau ona toe i ai se isi suiga. E le o le manatu faatauvaa o lo o i ai nei le Pulega, a o lou manatu tatou faia mea silisili, ae eseese foi matata, e ese foi aoga tau le Iunivesite, ese foi le natura o galuega o aoga faamatata eseese. E talitonu foi o le vaai mai foi i fafo, e taulai mai lava le latou vaai e talitonu o lena e silafia e lau Afioga, e tele lava lo latou agai mai ae agai mai lava i

aoga faamatata eseese. Aua o le tatou Iunivesite e tatou te talitonu a fua atu i tagata faigaluega, e tele atu tagata e manaomia e iu mai totonu o aoga faamatata eseese, nai lo tagata e galulue faa-Iunivesite.

Ona ou oo mai lea i lau Afioga i le Sui Palemia po o le Minisita mo Punaoa Faalenatura ma le Siosiomaga. Se i e silasila ifo lava lau Afioga, le tulaga lava lea i le lauina o le oneone, e le fuatasi foi i ni nuu ma tulaga faapena. E fautuaina lava lau Afioga ina ia ave i ai se fautuaga malosi ma faatino le Tulafono, i le mea lea o le aia o le lauina o le oneone, o la e i ai le Tulafono mo le lauina o le oneone. O lau maitau o le aia o eleele ia o le atunuu, e toe tele foi tupe a le tatou atunuu e toe tatalo mai ai foi i le tatou Malo, e toe tanu ma fai taligalu ma tulaga faapena, ona sili lea ona taugata o le lauina o le aia o tatou eleele.

Ona oo mai lea o lau faamatalaga i mea ia o faatoaga o laau faasaina, e le o toe po se lilo i le faalavelave lea na tupu mai i le itu lea i Sisifo o le motu o Upolu, o lea foi na faasau i le nusipepa si tamaitiiti lea na maliu i totonu o le faatoaga. O lau tatalo i le tatou Malo, se i silasila i faasalaga o mea nei. Aua o lea ua ou talitonu i le tagata e totoina le mea lea, lau Afioga e matua leai lava se fefe i le maliu ma le oti o le faaoo le oti, o tagata e latou te faia faatoaga ia e matua le fefe lava e fai le maliu ma le oti. O lona uiga o lau tala, se i silasila lava i le Tulafono ma faasalaga o tulaga ia, e tatou te autilotilo i ai ina ia faaitiitia. E le gata i lea, o lea foi e tatou te silasila i malu o le malo i leoleo e o e faatino mea ia, e matua lamatia lava le soifua, ona o tagata e latou te totoina mea ia, e le fefe latou e faaoo le maliu ma le oti i tagata o lo o o atu e taumafai e saili, o lea ua oo lava i alo ma fanau o latou lava afioaga, e le o toe fefe lava e faaoo i ai le oti.

Ia ou te talitonu ona faagata mai ai lea o sa matou tala, lau Afioga i le Fofoga Fetalai, pau le matou tatalo, o nai manatu ma nai motugaafa e tuu atu i le Afioga i le Palemia ma le Kapeneta e fai i ai le latou fua. Ae ou te lagolagoina le Tulafono Tau Faaofi o le Faatatauina o Tupe Faaopoopo (Nu.1) 2017/2018. Manuia lau Afioga i le Fofoga Fetalai, manuia le Palemene.

FOFOGA FETALAI: Malo faafetai, malo saunao i le sui usufono mamalu mo Safata.

Ua ou manatu ua tulai mai se tasi o sui usufono mo Salega Sisifo, Afioga Toomata Aki Tuipea.

Afioga TOOMATA AKI TUIPEA (Salega Sisifo): Faafetai i lau Afioga i le Fofoga Fetalai mo le avanoa, ou te avatu foi le faamalo ma le faafetai i lau Afioga i le tauaveina o le tofi ua valaauina ai lau Afioga. E maitauina lava ma le totoa le l atoatoa o le malosi o le tino, ae o lo o e faataua lava lou valaauina. Ia faamoemoe i le Atua e foai mai le malosi i le tino ma le mafaufau aua lava le faaauuina o le auaunaga mo le faafoeina o le Fonotaga usu a le Palemene o Samoa.

E faafeiloai atu foi i le paia o le Afioga i le Taitai o le Malo ma le Sui Taitai, Afioga i alii ma tamaitai Minisita, Afioga i Minisita Lagolago aemaise o le Palemene o Samoa.

E faatalofa atu foi i Faauluuluga ma Faalapotopotga a le Malo aemaise i latou uma o lo o vae ma lima aua le tautuaina o Samoa, e ala i galuega fai a lana Palemene.

E muamua ona ou faapea atu e matua lagolagoina e lenei itumalo le Tulafono Tau Faaofi o le Faatatauina o Tupe Faaopoopo (Nu.1) 2017/2018. E avatu ai le faamalo ma le faafetai i lau Afioga i le Taitai o le Malo ma le Kapeneta ona o galuega tetele ua mafai ona faatino ua vaaia i totonu o le tatou atunuu mai le tele o tausaga e oo mai lava i lenei taimi, e le gata foi i lea o galuega faaauau ma galuega o lo o fuafua. E muamua ona ou faafetai ona o le tele o fuafuaga a le Malo o lo o faataatia aua lava le atinaeina o le tamaoaiga o Samoa, ina ia tutusa tagata uma. E le gata i totonu o le taulaga ae faapena foi i nuu i tua aemaise o le Motu tele i Salafai. Ou te talitonu, ole agaga o le Malo ia mafai e o tatou lava tagata ona ola i se olaga saoloto, se olaga fiafia, se olaga aoaoina, ma ia maua le toafilemu i totonu o lo tatou atunuu. O le toatuga o lo o i ai e le lava a tatou tupe. O le mea lea ou te lagolagoina ai selau pasene le Tala Faatatau o le Tupe i fuafuaga ma galuega o lo o fia faaauau ma faamaea.

Ona faapea o lau faafetai muamua, faafetai i le Malo ona ua i ai se fuafuaga se isi Faletupe e pei o le World Bank ma le Asian Development Bank e faatuina i totonu o Samoa sona lala, aua ou te talitonu, o le a mafai ai ona tauva ma isi faletupe o le lalolagi e faafaigofie mai ai ni nonogatupe e mama ona tului, maua foi avanoa e faigaluega ai o tatou tagata aemaise le tele o avanoa e ono maua ai se fesoasoani e faatupe ai atinae a lo tatou atunuu. Ou te talitonu o le avanoa lelei foi lea, o le a maua ai se nonogatupe se fesoasoani e atinae ai le Motu tele i Salafai, o lo o matou moemiti ai sui usufono o Salafai ina ia tupu mai i lo matou taimi e fia atinae le motu ina ia faapena ona taofia ai o matou tagata ma le tau malaga mai Upolu nei, e le gata e taugata le feoai o pasese e tau sue se mea e nonofo ai i Upolu nei, ae tele foi ni faafitauli o le a tutupu mai i le tau faasoa a le Malo i tulaga tau vai, auala ma itu uma faapena. Ae afai ae maua se fesoasoani, o le a mafai ona atiae le uafu, faaleleia le taulaga i Salelologa, ou te fautuaina ai le Malo e ala atu i lau Afioga i le Fofoga Fetalai, se i silasila i fanua ia e tau atiae i Salelologa, ou te talitonu ua tele kamupani ua mananao e fia amata a latou pisinisi, ae o le faalavelave o le matua tele o le tupe e alu ai i le tulaga o lo o i ai le vanuvanu o le laueleele o lo o i ai i ina i Salelologa. O fanua ia ua uma ona ave mo le Malo. E a pe a ave se fesoasoani a le Malo e tanu po o se 100eka, ona faapena lea ona faatosina atu i ai nisi kamupani, ona faasolosolo lava lea seia oo ina nofoia vave e ni pisinisi aemaise foi o Matagaluega a le Malo. O lea foi e fautuaina ai Matagaluega a le Malo nisi o Matagaluega tetele, ua tatau lava ona fai ni ofisa i Savaii, aemaise lava le Matagaluega o Aoga ma nisi o Matagaluega. O lea ua i ai le fuafuaga a nisi o Matagaluega e fai o latou ofisa i Salelologa, o se fuafuaga tatau ma le lelei, ina ia faafaigofie ai i tagata o le Motu i Salafai ona agai ane i ai ma le tau omai i inei i Apia e taugata le pasese toe tau sue se aiga e nofo ai, ma tele tupe e alu ai e tau sue e totonu ai ia mea e fealua ai i totonu o Upolu.

O lona lua, ou te avatu le faamalo ma le faafetai i le Pulega o le Suavai, e ala atu i lau Afioga i le Fofoga Fetalai ma le Afioga i le Minisita aemaise foi le Komiti Faatonu ma le Pulega. I le taimi nei ua tele nai aiga ua leva ua fia tausaga e le oo i ai se vai i totonu lava o lo matou itumalo, o lea ua amatalia galuega i totonu o lo matou nuu, ae talosagaina faamolemole, nei faifai foi toe me i mai, ae le i uma ia nuu e i ai Fagafau, Samataiuta, Fogatuli ma Faiiai ma faasolosolo mai ai. E tele nai aiga e le i oo i ai ni vai, a o le vai o le ola, a leai se vai, ia ua leai se aoga e ola ai. O le mea lea e talosaga atu ai, ina ne i te

i foi ua alu alu faaselemutu ae le uma ona fai le galuega. A o faalogologo mai le afioga i le Taitaifono o le Komiti o le Suavai, aemaise foi le Ofisa Sili o Pulega, faaauau le galuega lelei, faaauau le galuega lelei o lo o manaomia lava le suavai i nai aiga e le i oo i ai se suavai. Ma e to lou pulou i tamaitai o lo o pulea lea Mataglauega, e le gata i le Ofisa Sili o Pulega a o ia foi o lo o vaai le lala i Salafai, o tamaitai foi. Ua taunuu ai lava ma faamalosia le muagagana, e au le inailau a tina. Ou te talitonu ua leva ona talosaga foi i isi afaigaluega foi sa i ai, ae ua leva ona fai ae leai se mea o faia, a o lea la ua faatino, e to lou pulou ma e tatalo ma le faaaloalo faaauau lea galuega lelei, se i maea lelei Salega ona me i mai lea i isi itumalo e taugofie, aua a toe me i mai foi ia masini i Salelologa, e taugata foi le toe avatu i isi itumalo ae faaauau mai pea se i tau mai i isi itumalo na e sosoo atu.

Ua ou faalogo i le faasalalauga ou te le iloa pe sao, ua i ai se faamamaavega mo le afioga o Asau i le latou vai faapea ua 30% ua faapau ai le pili, ou te le iloa pe sao ae na ou faalogo i le faasalalauga faapea ua uma ona fai le faaiuga, ia o se faamamaavega lelei. E manaomia foi la e lo matou itumalo lea faamamaavega, afai ua ave i na itumalo, e a pe a aumai. A 30% lea ou te faalogo atu o lo o maua e Asau ona o siama o lo o maua ai, pau lava lou atugaluga, ailoga o le fofo lea o le faafitauli, o la lava e tumau ai siama i totonu o le vai ae ua faapau la le tau, e le foia ai la le faafitauli. Ou te talitonu o le mea e tatau ona fai....

FOFOGA FETALAI: Se i tulai mai le Minisita mo Galuega, Felauaiga ma Atinae Eseese, ona ua fai sina mamafa o le tuuaiina.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eseese): Lau Afioga i le Fofoga Fetalai o le mea e fia faasao i le saunoaga matagofie a le sui usufono mamalu. O le faamamaavega lea na tuu i le afioga o Asau ona e mai le latou suavai. O le tulaga o le lelei o le suavai mo le taumafa aemaise foi o le soifua maloloina, ua i ai foi treatments la ua fai e le Ofisa mo le chlorine, e leai la se mea e popole ai lau Afioga. A maea la outou galuega, siaki le tou vai a faapea e mai foi, ia e maua foi lea faamanuiaga. Ina ne i meaane lau lauga e faaseseina ai isi afioga la e lelei a latou vai, o le a talosaga mai foi i ni faamamaavega. O le tulaga tonu lava lena ua ave ai le faamamaavega i le afioga lea o Asau. Ma lou faaaloalo lava.

FOFOGA FETALAI: Ia se i tulai mai se tasi sui usufono mo Salega Sasae, Tofa Olo Fiti Afoa Vaai.

Tofa Olo Fiti Afoa Vaai (Salega Sasae): Lau Afioga i le Fofoga Fetalai, leai o le mataupu e pei ona faaalua e le Afioga i le sui usufono mamalu. Ia ou te faalua lea le finagalo o lou uso a sui usufono i le maua foi faaitu, e mai maoae lava vai o Salega, a o le mea foi lena sa avatu ai foi se talosaga foi i le tausaga ua mavae i le faamanuiaga lava lea, a o lea ua ou tulai atu e faamaonia le saunoaga a lou uso a sui usufono o le ma itumalo, e mai foi a matou vai. Ma le faaaloalo.

FOFOGA FETALAI: Malo. Malie se i tulai mai le faauilavea a le sui usufono mo Anoamaa Sisifo.

Tofa Hon Lauofo Fonotoe Nuafesili Pierre Lauofo (Anoamaa Sisifo): Lau Afioga i le Fofoga Fetalai, e fia faaopoopo atu lava ma le vai o le matou afioaga o Lalomanu i Aleipata e sili atu ona mai le matou vai lena i lo se isi lava vai o i Samoa nei, faamolemole.

FOFOGA FETALAI: Malo. Tulai mai le sui usufono mo Palauli le Falefa ona o lea ua taunuu i le tulaga lea se i...

Afioga Hon Faumuina Tiatia Faaolatane Liuga (Palauli le Falefa): Lau Afioga i le Fofoga Fetalai, e mai foi le matou vai ae ua uma ona fua i le fua lea e fua ai le vai e mafai ona taumafa ma le vai e le mafai ona taumafa. O lona uiga e tatau foi i sui usufono nei ona o i le... ma le falemai, se i fua o latou vai pe ni vai e mafai ona taumafa pe leai. Faafetai.

FOFOGA FETALAI: Ia, o lea la ua maea tulaga o mea tau vai mai e le toe taua la aua o lea ua faamalamalama mai e le Minisita le mea e tatau ona fai ma le mea foi e tatau ona oo i ai, o lea ua saunoa le sui usufono mo Palauli le Falefa e ese le manino o le toeaia lenei i solution e fai ai faafitauli nei.

Se i tulai mai la le sui usufono o lea ua...

Afioga TOOMATA AKI TUIPEA: Faafetai i lau Afioga mo le avanoa faaauau, faafetai foi i le Afioga i le Minisita mo le faamalamalamaina o lea tulaga, o le mea sili o lea ua maua atu, o le a taumafai foi ina ia vaai se isi e alu atu e vaai ma aumai se Lipoti. Ou te le teena le faamamaavega ua ave i Asau, leaga o Asau o lo o tele foi lou pito i Asau e tele foi ou tagata o lo o i ai, ae pau lava le mea ou te popole ai, o lea e faalogo atu ua ave i ai le faamamaavega ae le o foia ai le faafitauli lea i le siama, ne i te i ua atili ai ona mamai si o matou nuu i lea vaega ae vave fai i ai se fuafuaga. Mea sili o lea e i ai le Afioga ia Lopao ina ne i te i ua faaauau.

O le isi itu ou te fia faafesiligia, o le a le umi o le faamamaavega?

FOFOGA FETALAI: Malie le sui usufono mo Salega o lo o saunoa se i toe tulai mai lava le Minisita mo Galuega, Felauaiga ma Atinae Eseeese. Se i saunoa manino lau Afioga.

Susuga Hon Papaliitele Niko Lee Hang: Lau Afioga i le Fofoga Fetalai, o si mea lava lea e toe fia faamalamalama i le Afioga i le sui usufono mamalu o lo o aafia o latou suavai taumafa i le mai o le suavai. E manatu o Afioga i sui usufono ia na tutulai mai, ua leva tausaga o vai tou suavai, a o lena tou te soifua maloloina lava. Na o le pau lea o le itumalo na aumai lava le talosaga aloaia ona ua siaki atu e le falemai e le saogalemu mo le fofoga taumafa. A o le process lena e tapena i ai, avatu ni tagata faapea e toe siaki tou suavai, a sefe lava mo le fofoga taumafa, o lena e lelei, e le o mai lava pe oti ai se isi ua leva ona outou taumamafa i le suavai mai. A faapea o le tulaga lea e laga e le Afioga i le Minisita, e fai le siaki a le falemai pe talafeagai mo le fofoga taumafa o le mamalu o le atunuu. A maua la faamaumauga na ma faamaonia, atonu foi e aumai le talosaga tusitusia ona vaai foi lea o le Board a le Suavai i se tulaga e tatau ona fai aua a faapea o le mea lea ou te tau maitau atu, o lea e talosaga mai e aua le totogia pili o vai ae faapefea la ona fai galuega a le Faalapotopotoga o le Suavai. Ma lou faaloalo lava.

FOFOGA FETALAI: Malo. Manaia le finagalo o le Afioga i le Minisita. Tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga e taua tele le tulaga lea ua tulai mai i vai, ona o le tulaga lava e tatau ona fai a mai loa, e tatau loa ona soloia ae ave fua vai. Ae se i vaai lelei le fuatapu o vai pe faigofie lava o lea ou te tomanatu i le mea na tupu i le isi tama o le Manu Samoa, na fai lana test e alu ai i fafo ona aumai lea o lana sample ave sue i le falemai na matala mai loa le falemai alu atu alu atu, fesili mai lea i ai, o mea ia na maua i lau sample lea na aumai e iloa ai pe te mai pe leai ona e alu lea i fafo. O le mea lea ua tau mai i le sample lea na aumai, ua ono masina na ua e to ai, ua nofo le alii ma ave le vai o le sample o lona toalua e ave e sue i le falemai a o la e to le fafine. A faapea i te i ua alu atu maua ai, o le mea lene na tau e le falemai e ono masina lea e te to ai, se i sue ane lene vai po o fea ne i faapea e aumai Savaii ae leiloa pe na asu mai lava i Vaisigano ona avatu loa lea sue i uta. A o le mea lava e tatau ona fai, a aumai loa, kiliva fua le vai.

FOFOGA FETALAI: Malo. Manaia le saunoaga faamalamalama a le Palemia o lea foi ua saunoa manino le Minisita ae pei ua maitau mai e le Palemene le tutulai atu o Faumuina Liuga ma le Matua ia Lauofo pei o sui usufono aupito tino lelei lea o le tatou Palemene lea e i ai, ailoga o afaina o latou suavai. Ae ui i lea, tulai mai le sui usufono mo Salega e faaauau le saunoaga.

Afioga TOOMATA AKI TUIPEA: Faafetai i lau Afioga i le Palemia mo le faamalamalamaina o lea tulaga, faafetai foi i lau Afioga i le Minisita mo Galuega. O le a ou see ese ae tautuana ma oe, o le a faapena lava ona fai. Faafetai lava.

Ona ou oo mai lea i le isi mataupu lea ou te momoli atu ai le faafetai tele i lau Afioga i le Minisita mo Faatoaga, ona e ui lava i aso malolo o le kerisimasi, ae sa maua sa e asiasi atu faalilolilo i faatoaga a itumalo e i ai le matou nuu, o lene sa e maitauina ai le matua faafitauli i auala. O le mea moni lava ua uma ona fai le tasi a le nuu e o taulelea e momoe i uta ina ia foia ai le faafitauli lea o puaa aivao tulou le Maota, ua tau le mafai ona galueaiina uta i le mea e agai ai i faatoaga ona ua tele le puaa aivao. Ona fai ai lea o le tasi a le nuu aemaise foi le matou itumalo, e o taulelea e momoe i uta ae tuu o latou faletua i tai, se i taumafai e foia le faafitauli lea i meaituaolo. A o le faalavelave ua toatele nai aiga ua aumai a latou taavale mai fafo i a latou fanau ae ua matua faigata lava ona sao i uta, seiloga lava o le palau ma le four wheel drive ona faatoa sao lea i uta. O lea la e talosaga atu ai ma le faaaloalo, se i fesoasoani ane i ai lau Afioga i le Minisita mo Faatoaga i le Afioga i le Minisita mo Galuega e faamaonia ai le faamatalaga lea e avatu, a maua lava sina... e foia ai le faafitauli lea o le ae i luga o taavale e le mafai ona ae, ona na o se mea e sua ai i luga, ona alu atu lea i se taimi e te toe asiasi atu ai, e te alu atu ua lanumeamata uma uta i le taamu ma le talo.

Ou te toe avatu ai faamolemole le talosaga e pei ona oo atu, e toe faamanatu atu i lenei tausaga fou 2018 se i silasila ane i ai i nai auala pe....

FOFOGA FETALAI: Se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Ou te faafesili atu i le sui usufono i lau Afioga, i le siusiu o le saunoaga a le sui usufono ou te fia malamalama ai, e o i uta taulelea ae tuu o latou taitoalua i tai. Ai ana o ma ave o latou taitoalua, e sao lava i uta taavale.

FOFOGA FETALAI: Ia, ua ou iloa e faapena foi uiga o le suavai lea e tau ave mo Salega. Ia tulai mai lau Afioga i le Sao e saunoa.

Afioga TOOMATA AKI TUIPEA: Lau Afioga ua ala foi ona fai lea tulaga, ona e pei foi o le mea lea e sosola ai i tua pagota foi lea, ae sa fesiligia pagota ae fai mai, e ala ona sosola i tua o le fia vaai i a latou ava. Ma lou faaaloalo lava. Ia atonu o le mea lena ua ala ai foi ona fai le fuafuaga ia taofi i tai o latou faletua ae o na o au galulue i uta ia lava le latou taimi e galulue ai i faatoaga ae aua le faataugaina le isi taimi.

Ia ona ou oo mai ai lea i le Matagaluega o Faatoaga. E avatu le faamalo i lou uso a Minisita, e ui ina puupuu lou taimi ua tauaveina ai le tofi, ae ou te talitonu o oe o le tautai matapalapala ua lava lou silafia i koko, popo ma fai, aemaise foi manupapalagi. Se i silasila ane i le tulaga lea e i ai le atinae ua leva lava ona alu ai atinae a le Matagaluega ae leai ma se mea o fua mai, o le atinae lea o le vanilla. Na ou alu atu lava ou matamata, na o le teu teu teu o nei vanilla, masalo a faaopoopo le tau lea ua alu ai i tagata faigaluega ma... ua maua ai ni fale tetele se fia. A o le vanilla la e oo ai lava i le taimi lenei, e leai lava ni fua mai o ia laau. Ou te talitonu o lo o molimauina foi e le Afioga i le Palemia aua sa toto foi ona vanilla, ae ou te le iloa la po ua fua mai. Ae ua ala ona ou laga, ina ne i maumau ai tupe a le Malo.

FOFOGA FETALAI: Ia, se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o le vanilla, sa ola i Amerika i Saute, e fua lava la faasoloatoa ona o atu loa lea o le toatele o atunuu sa misiona ave le vanilla toto i o latou atunuu. O le mea la lena na tupu e leai ma se mea e fua ona faatoa o ai loa lea tilotilo tilotilo, e tasi lava le manu o lana amio lena e alu ifo e faafeusuai le vanilla. O le faalavelave la ua aumai mai fafo le laau ae le aumaia le tamai manu lea manu feleleai, lena la lea e aoao ai e tagata e totoina vanilla le faafeusuai o laau, ae toe alu atu la ma le tamai laau si tamai mea laitiiti lava pei se afitusi na ona e eua lava i luga o le isi lena e ufi ai ou te usu lava la i le taeao po e fai le mea lena. A o lena e fai ai aoaoga a le Esetete Tausi ma le tatou Ofisa o Faatoaga e faafeusuai, e le mafai ona faafeusuai e ni manu e tai pei o le pi, e le mafai. Na o le pau lava le ea e faafeusuai ai, o le fasilaau lena e pei o se laau afitusi ae fai la e tagata, ae tatau ona fai i le taeao ae le i oso mai le la. O le faamalamalaga la lena. O la e la ua toatele tagata i Alafua ma o i le Esetete Tausi la e ua amata ona fua ae faaoga i ai le afaigaluega e faatinoina le faafeusuaiga.

FOFOGA FETALAI: Malo. Ia se i tulai mai lava le sui usufono mo Palauli le Falefa.

Afioga Hon Faumuina Tiatia Faolatane Liuga: Lau Afioga i le Fofoga Fetalai, o le taua ia o le mea lea ua saunoa i ai le Palemia. O le mea e tataua ona faailoa mai e le Palemia pe faapefea ona iloa le vanila poa ma le vanila fafine aua afai e feusuai le fafine ma le fafine, e leai se mea e tupu.

FOFOGA FETALAI: O le tulaga lena o lea e tau fai ai le faamatalaga a le Nofoa. Tulai mai lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Sa ou faamatalaina atu, masalo o le aloaia o le vanila, e tai pei uma lava o le faisua, e te maua uma lava i i le poa ma le fafine i le faisua e tasi. E faapena foi la i le vanila, e maua uma lava e i totonu lava o le mea lea. O le ala lena na ona e tago lava eu ifo le mea lea i luga agai i lalo ona atoa loa lea o le feusuaiga. E masani ai tatou tamaloloa.

FOFOGA FETALAI: Malo. Ou te fautuaina le sui usufono mo Salega sa faamamafa le tulaga lea ina ia faaavanoa sou taimi e feiloai ai ma le toeaina i tua ae tautuana ma oe se api ma se peni ia mafai ona matua faamalamalama atu e le toeaina ia te oe mea ia. Ia, tulai maia e faaaau le saunoaga.

Afioga TOOMATA AKI TUIPEA: Faafetai i lau Afioga i le Fofoga Fetalai faafetai foi i le Palemia. O le agaga tonu na ala ai ona laga, ona na ou alu atu i tua po ua 20 nei po ua 30 tausaga o ou vaai i le Matagaluega, o atinae lava lenei mea o le vanila fai mai pe lima lava au pupu vanila e te milionea ai. Ia o la e lava e faapena ai lava e leai ma se mea e oo mai i lenei taimi. Ae a ou mafaufau la i le tau, o le matua taugata lava.

FOFOGA FETALAI: Se i toe tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, sa fai aoaoga pe a ma le 25 tausaga talu ai na fai la i Alafua sa aumai ai tagata mai fafo e faataitai le mea lea. O le faamatalaga la a le isi na sau, o ia lena na te export ina le vanila atoa lava i totonu o Fiti. Fai mai a sefulu au tone o loli e avatua tagapopo e fua, e tutusa lelei lava le tupe e te maua ai ma le loomatua e alu atu i le pasi ma si ana tamai paelo lava o vanila ia e fua. O le eseese la lena i le tele o le tupe e maua mai le vanila ma le tupe e maua mai le popo. E sefulu ia loli popo tetele, ae na o si tamai paelo lava laiitiiti lava o le vanila ae tutusa lelei lava le tupe e maua mai i le tamai paelo lea ma le tupe e maua mai i le 10 loli e tumu i taga popo.

O se lumanai lea e taua tele mo Samoa, o le ala foi la lena lea e agai tele i ai ia le Esetete Tausi masalo la ua fua lava la ua faasolo fua, ma e ono tele le seleni e maua mai i i. E sao sa e taua ia au vanila la e toto, o au vanila la, o la e tau sue ni poumoli e avatu e tietie ai i luga le mea ua matua mamafa tele, ona o le fua o vanila. A oo i se aso ona ta o lea e te tilotilo i ai, ae la e ola i tua i Lepa, ae leai la se isi na te gaioia aua e le iloa po o a mea a fai i ai.

Afioga TOOMATA AKI TUIPEA: Faafetai tele lava mo le faamalalamalama o lea tulaga, ia ua lelei o le a sema se aso, ona ou savalivali atu lea i lau Afioga, se i ou matamata i ai i lau toga vanila. Ae o le a ou see ese ma le vanila, ae see atu i le povi.

O le manupapalagi lea o le povi, ia ua leva ona taumafai mai ia le tatou Malo e aumai mai fafo ia tatou manupapalagi mai Ausetalia. Masalo pe ua lua ea po o ua tolu uta povi, ae oo mai i le taimi lenei, e le o taitai lava ona lava ia povi. O le faafitauli lea e i ai o lea e taumafai le Matagaluega e taofiofi ia le fasi o manu i mea ia o faalavelave, aemaise ia tatou faalavelave faasamoa.

Na ou manatua ai lea o le isi tausaga, sa ou malaga ai sa ma fetai ma le isi tamaloa faipisinisi i Niu Sila, ona fai mai lea ia te au, pe maua atu iinei se 500eka e ma te lisi. O le tamaloa e i ai lana lafumamoe ma povi ma le tele o ana pisinisi, ae i ai la le breed faapitoa mo le teropika. Sa ma o la ma matamata i uta, ou sau loa logo le Afioga Minisita sa i ai i lenei vaitaimi o le a ou le taua le igoa, na ou talosaga lea i ai o lo o i ai se faipisinisi i fafo o lo o manaomia se 400 po o le 500 eka na te lisiina e aumai e fai ai lana faatoaga manupapalagi.

Sa o matou o la vaai ia uta i Togitogiga ma Avele ia ma i ina i Vaea, ou fai atu lea, e sili ai pe a tapuni ia le tatou Matagaluega i mea tau povi, ae sau le tamaloa lea e fai ia ana lafupovi iinei ia e tele ai ia tatou tupe. Ia apeitai, ua alu alu, ua ou fiu e faatali....

Tofa Hon Lopaoo Natanielu Mua (Minisita mo Faatoaga, Vaomatua ma Faigafaiva): Lau Afioga i le Fofoga Fetalai...

FOFOGA FETALAI: Ia se i tulai mai le Minisita o Faatoaga, Vaomatua ma Faigafaiva.

Tofa Hon Lopaoo Natanielu Mua: Ia sa le manao lava e faalavelave i le saunoaga matagofie a le sui usufono mamalu, ia e i ai le agaga sa ou manao lava e sema sou taimi foi lele se i fai atu ai sau tala aloaia ona o lou tofi o au nei e fou mai i lenei itu o le Maota, ae o la e faafofoga mai le atunuu ma si ou itumalo, ae ui i lea, e tatau pea ona avatu ni nai tali o nisi o mataupu o lo o laga e sui usufono mamalu e pei la o le Afioga i le sui usufono mamalu o lo o saunoa nei.

Leai o le aoga lea lea ua i ai le fuafuaga e taumafai e faaaoga e uunai ia tagata e faaaogaina ia ni fanua i tua i elele i o tatou nuu ma afioaga e mafai ona fai ai ia tulaga faapena, ua tau utiuti foi ia elele o le Malo. Ia sa taua foi ia tulaga i faafeusuaiga o mea nei o laau, ua tele lava lou fia tu atu e faamatala atu ia le faiga o mea, ae leaga o lea na faasa mai e le Afioga i le Fofoga Fetalai ananafi le faaaogaina o le upu lea sa faaaoga, leaga o upu tonu lava na e faamatala ai le faafeusuaiga o mea nei o laau ma manu lau Afioga. A o se isi itu o le tatou Matagaluega i uta i Vaea, o lo o lelei ma gasolosolo lelei le polokalame o le toe uunaia o tatou lafumanu. O le taimi lenei, e faapena foi tua i Togitogiga, o Lemafa, e le gata i le mamoe ia a o le tulaga i manupapalagi. Ou te manatu o se taimi o i luma se taimi lata mai, o le a faapea ona avanoa lo tatou atunuu mo nisi o manu e i ai le faafeusuaiga fou lea ua i ai nei, lea ua amata ona ave i tua, lea foi e i ai sui usufono mamalu o le Maota nei na talosaga mai i manu na o atu lava totogi. E totogi lava lau

manu e le faapea e te alu atu ona ave fua lea. O la ua amata ona avatu ma kiliva atu ia nisi o manu sa talosagaina e nisi o le Maota lenei faapena foi i tagata faifaatoaga, ia ae i ai le manatu o lo o lelei ma sauni lelei ia le Matagaluega i le itu o lafumanu faapea.

Ia ma le isi mea i le tulaga lea i le vanilla, o la e ave le vanilla i fafo e le Women in Business. Ae pau lava le aiaiga e manaomia, e tataua ona certify organic lou fanua. A faapea e i ai se tulaga faapena ua uma ona saunia mo lo outou eleele, e faapena ona manaomia, e mafai ona ave le tou vanilla i lalo o le Faalapotopotoga lea a le Women in Business.

O nisi o tulaga o i ina i Taga, o lo o i ai le faifaatoaga i Taga o lo o ia totoina le vanilla, ia e i ai lana maketi faapitoa foi o lo o tauala atu i le faalapotopotoga lea. Ia ma le faaaloalo lava e fesoasoani atu ai i nisi o mataupu na e saunoa ai.

FOFOGA FETALAI: Malo, tulai mai le sui usufono e faamaea mai le saunoaga ua maea foi lou taimi.

Afioga TOOMATA AKI TUIPEA: Faafetai i lau Afioga i le Minisita, ia ou te le o refer i le taimi lenei. Ae lea e fai lau faamatalaga i le taimi tonu lena e pei ua ono tausaga, sa matou aumaia i le taimi lena ma vaai, ou fautuaina loa le toaina sa i ai i lena taimi, e a pe a sau le tamaloa lea mai fafo e fai ai lana atinae manupapalagi ae sili atu lena e tele ai ia tatou tupe ma tele ai manupapalagi.

O nisi auala sa talanoa mai ai le tamaloa, ia masalo ia tulou lava le Maota, i le faafeusuaiga o manupapalagi, i lo o le aumai o le uta povi, o le aumai foi ia mo vaeane lava ou te le iloa faasamoa le tulaga o le... ia e aumai e faafeusuai, e aumai le poa lena ona aumai lea faafeusuai ma le manupapalagi lenei, ia ona maua ai lea o ana tama e lelei. Ia tasi lena idea ou te iloina lea e malamalama i ai le Matagaluega ma lau Afioga, ia na ona faaataata atu faapena, atonu e aoga foi e silasila i ai i se taimi, o le aumai lea o sua, tulou lava le Maota ma le faafofogaaga a Samoa, a le poa tuu i totonu o le manupapalagi tamaitai i inei, ia ona faapena lea ona maua ai nisi povi lelei. Ia ae faamalo atu lava i lau Afioga.

Ia o le isi itu, o le fai foi lea isaraelu...

FOFOGA FETALAI: Se i faaiu mai le saunoaga, faamaea lau saunoaga i si mea na e tasi e totoe.

Afioga TOOMATA AKI TUIPEA: O le a faauma atu lau faamatalaga i le fai isaraelu, faafetai lea ua aumai lea foi ituaiga fai i Samoa, lea sa faapea ai e ese mai i le faipalagi foi lea e masani ai tatou. Ae pei na ona ese lava o le igoa, ae o le fai lava e tasi, o le fai lava lea a tatou ua leva na i inei, o le fai lava e tasi, e tumau lava o le faipalagi lava ai na ona sui o le igoa isaraelu, ia e le o Isaraelu la e aumai ai, e ese foi le atunuu la e aumai ai.

Ia ona faauma atu ai lea o lau faamatalaga, faafetai tele lava mo le avanoa. Ou te faamalulu atu pe afai e i ai se faamatalaga ua paopapa, ae o le agaga lava e fia faamanino ma faamalalama nisi o mea e manaomia ai le fesoasoani, e le gata i o matou itumalo, ia ae faapena foi tagata lautele.

Ia alofa le Atua ma foai atu pea le tofamamao ma le faautautaga loloto i lau Afioga i le Taitai o le Malo, le Sui Taitai ma le Aiga Kapeneta aemaise lau

Afioga i le Fofoga Fetalai. Faafetai, faafetai tele lava mo le faafoeina o le Fonousu a Samoa, ia saga foai e le Atua le malosi i le tino ma le mafaufau, aua le feagai ai ma lou valaauina. Ia soifua.

FOFOGA FETALAI: Faafetai, malo malele, faafetai saunoa i le sao a lau Afioga i le sui usufono mamalu mo Salega, ona o tatou Tulafono Tumau e fua lava a tatou taimi ma tapulaa o saunoaga, ae le uma le fia faalogologo i le saunoaga ma mataupu lagalaga e pei ona aumaia e lau Afioga, ia e leai e maua foi avanoa i Mea Taitasi pe a tatou see atu e iloilo le tulaga o le Tulafono, ia ona toe maua foi lea o avanoa a lau Afioga ma nisi o sui usufono mamalu. O le mea la lea, e momoli atu le faamalo ma le faafetai, ia e faamalulu atu ona o tapulaa e pei ona faamatala mai e le tatou Tulafono Tumau.

Ia se i tulai mai se isi sui usufono e fia saunoa. Ia ua maitau atu ua tulai mai ia le sui usufono mo Gagaifomauga Nu.3. Tulai maia lau Afioga i le tamaitai faipule, sui usufono mamalu.

Afioga FAAULUSAU ROSA DUFFY STOWERS (Gagaifomauga Nu.3): Faafetai lava i lau Afioga i le Fofoga Fetalai mo lou avanoa, e tulai atu lava ma lou agaga faaaloalo, e piiama atu foi se lagona i le tootoo na se i mavae atu nei. Ae mo le faamanino atili o le vaega lea, ou te le o piiama atu i ai ona o tulaga tau feusuaiga, o mea lava na ma ana metotia a le sui usufono mamalu. Ae piiama se lagona ona o le faafetai i le Taitai o le Malo, ia ma le Faigamalo o lo o i ai nei i le atinaeina o le tatou atunuu i ona tulaga uma lava ma vaega eseese o le atinae o lo o i ai.

Ae o le tulaga o lo o opea i le Maota i le Tulafono Tau Faaofi o le Faatatauina o Tupe Faaopopo (Nu.1) 2017/2018, ia o i ina e agai i ai se faamatalaga, ma e agai tonu foi i le Afioga i le Minisita o Tupe ia se lagona vaivai. O le tulaga lea i le Matagaluega o Falepuipui, o lea sa maua foi i nisi o sui mamalu se i mavae atu i le aso ananafi, o lo o fesiligia ai lava le vaega lea o le tau o le galuega ma mea uma faapena. E agai tonu la se manatu po o se lagona vaivai, afai o le tulaga lea ma le ata lea sa faatulagaina mo le fausiaina o le falepuipui, o le a le mea na le tuua ai i totonu o le Main Budget i lona fuafuaina mai i lona amataga? Ae maitauina foi, sa i ai se tupe pau o le Paketi, ae sa faapena ona faatupeina ini vaega na o lo o taatia mai ai ona maua ai lea o sona faasiliga. Sa faapea la au o le faasiliga lena e ono mitiia ai ia le vaega lea le tau o le falepuipui, ia e faapena foi i unforeseen payments o lo o i ai, o lo o i ai se paleni o lo o i ai o lo o maitau mai lea i le Lipoti a le Komiti o Tupe Maua ma Tupe Totogi. Po o le a la le mea na le faaogaina ai le vaega lea e faatupeina ai ia le falepuipui? Ona o se fesili lena e agai tonu i i le Tala Faatatau....

FOFOGA FETALAI: Ou te fesoasoani atu i le sui usufono mamalu, ne i tuuaia le Nofoa e lea itu o le Maota, ua ou le faamanatu ia tatou Tulafono Tumau, ae leai, leai se afaina o le saunoaga. Pau o le mea e faamanatu atu, tatou te faatoa oo i Mea Taitasi pe a iloilo le tulaga o le tatou Tulafono, e lelei lava ona saunoa i tulaga lautele ma tulaga tau tamaoia ia e tusa ai ma le tatou Tala Faaopopo o Tupe. Ae saunoa le sui usufono mamalu, na ona faamanatu atu vailiu laiti ia mo le saunoaga e pei ona i ai.

Afioga FAAULUSAU ROSA DUFFY STOWERS: Faafetai lava i lau Afioga i le Fofoga Fetalai mo le faamanatu....

Afioga Hon Sili Epa (Minisita o Tupe): Lau Afioga i le Fofoga Fetalai, tali puupuu atu lava....

FOFOGA FETALAI: Malie ia se i tulai mai le Minisita o Tupe.

Afioga Hon Sili Epa Tuioti: Pei foi ona fesoasoani atu i le faamalamalamaga i le aso ananafi, o le konekarate lava ia mo le galuega ua faatino, e \$7.4miliona. Ia sa taua foi o le fuafuaga lava sa i le Ofisa o Tupe, e ave na o le vaega e 50% se i fua le faagasologa o le galuega a le konekarate. Ae a oo ina toe manaomia, e mafai ona toe tuu i totonu o le Supplementary Estimates. O le tulaga la ua i ai nei, o la ua tele le galuega ua faatino, ma ua mautinoa lava ua manaomia loa le afa lea \$3.7miliona lea ua tuu i totonu o le Tala Faaopoopo ina ia mafai ai ona faagasolo ma faamaea le vaega e le konekarate lava lea e i ai nei.

E pei ona taua, e tele isi vaega e le o lavea i totonu o le konekarate nei, e pei o le faiga o le pa, pei o le faiga o le auala, o le faiga o le suavai, o galuega na e ese lava, e toe tuu i tua e tender. E le faapea o le a faaauau lava e le konekarate lea e i ai nei. O le fuafuaga na i ai, sa tilotilo i le tulaga foi lele pe mafai ona faaoga uma ia le \$7.4miliona lea i le tausaga faaletupe nei. O le mafuaaga lena na tuu ai le \$3.7miliona i le Tala Autu o le Tupe, lea ua foliga mai ua vave le faatinoga o le galuega, ia o lea ua toe tuu ai i totonu o le Tala Faaopoopo o le Tupe le \$3.7miliona ina ia faapena ona faamaea ai le galuega a le konekarate lea ua i ai nei, ma le faaaloalo lava.

FOFOGA FETALAI: Malo, ia faafetai ia tulai mai le sui usufono mamalu e faaauau le saunoaga.

Afioga FAAULUSAU ROSA DUFFY STOWERS: Faafetai lava i lau Afioga i le Minisita mo le faamalamalamaga. Ia e moni lava au, ae e pei o le lagona lava na ona tuu atu lava, ia o le poloketi lava ia e ao lava ona i ai ni ata foi ia ona galue ai lea i ai. Ia ae ona o tulaga o le Tala Faatatau o le Tupe ma tupe o lo o available, ia atonu ai o i ina lea e mafua ai.

Ona oo atu ai lea o se faamatalaga i ni vaega foi ia e fia faamauina ai le lagona fialia, o le Afioga lea i le Minisita mo Aoga, Taaloga ma Aganuu, le Tamaitai Pule o le Matagaluega faapea le mamalu o le aufaigaluega, ia i le latou galulue foi ma le punouai i fanau aoga i tausaga ua mavae pei ona atagia mai ai i suega a le fanau lea na maua i le amataga o lenei tausaga. Ua manino mai ai ia le siitia o le fuainumera o alo ma fanau ua faapena ona faamanuiaina i suega, ma e talitonu foi o le galulue faatasi lava ma le tuleiina o matafai oi ma galuega faatino a le Matagaluega, ua ala ai ona tulaga mai i le tulaga manaia ma maoae ua i ai nei. Ia o le tatalo lava ia faaauau ai pea ia le tulaga lea ma faaleleia atili. O lo o moomia pea lava ni fesoasoani i aoga foi a si ou itumalo, ina ia faapena ona siitia ai ia le aoaoina o alo ma fanau a lou itumalo. Ia a o le i see ese ma le Minisita o Aoga, Taaloga ma Aganuu, e taatia atu i lau Afioga i le Minisita ia le malae a si o matou nuu o Aopo. O i ina o lo o i ai ia isi tama taaalo a le Manu Samoa i le lumanai, ae paga, e le o i ai se malae e mafai ai ona faatino ia le latou Manu Samoa o lo o i ai. Ae o la

e i ai le tomai ma le agavaa i ina pe a tusa ai ma le finagalo, ia e faataatia atu i tafatafa o lau Afioga mo lenei tausaga pe a tusa ai.

Ia lau Afioga i le Minisita mo Galuega, Felauaiga ma Atinae Eeseese, ia o tulaga lava foi o vai lava lea e talanoaina. Sa ou tau tulai foi i le taimi tuanai i le mai foi o le matou vai, ia ae ua faamalieina foi se lagona ona o le saunoaga a le Taitai o le Malo, e pau lava le mea na o le faamaonia o lo o mai, ona faapena lea ona aumai le faamamaavega i ai latou o lo o faaogaina le suavai i si o matou itumalo, o lo o faaletonu lava le tulaga o le vai.

Ia lau Afioga i le Minisita mo le Soifua Maloloina, ia e faamalo atu foi i lau Afioga foi mo galuega o le la tausaga, ia ona o lou sui usufono lava sa tele lava ina avatu ni lagona e tusa ai o auaunaga a le Soifua Maloloina i falemai faaitumalo, ae ua atagia lava le suiga ua i ai, ua siitia foi le faasologa o galuega a le aufaigaluega, malo lava faafetai, o lo o faailoa mai ai i ina o lo o tali mai lava le mamalu o le Matagaluega aemaise lau Afioga i manaoga o matou nei o sui usufono.

Lau Afioga i le Minisita mo Galuega, Felauaiga ma Atinae Eeseese, e leai ni matou auala o lo o faatagisia atu, ae nao nai nisi lava vaega laiti e tuu atu i tafatafa o lau Afioga ona o lo o i ai si nuu o lou itumalo la e le i oo i ai ni auala galue, pe a tusa ai ma lou finagalo.

A o le talosaga mulimuli lau Afioga i le Taitai o le Malo ma le Minisita o Tupe, o le talosaga vaivai pe a tusa ai ma finagalo. O lou itumalo ua mafai ona maua le tasi ona ua malilie uma o le a vaeluaina ia eleele o Aopo e faamatuu atu ia Sasina ina ia galulue ai Sasina i le folauga i lenei lalolagi, a o lona faalavelave la e i ai, o le l mafai ona ausia o le totogiina o lefuaina o le tuaoi. O lea la e tatalo atu ai ma lou agaga faaaloalo i lau Afioga i le Taitai o le Malo pe a tusa ai, pe le i ai se vaegatupe foi lea e mafai ona reserve mo ituaiga talosaga faapea e aumai i tua e itumalo, aua ou te talitonu e le na o lou itumalo e ono oo i ai, o lo o i ai foi nai isi itumalo e ono mafai ona manaomia lea fesoasoani, ae o lea ua ou amatamea atu ou te tatalo atu lea i lau Afioga i le Taitai o le Malo pe a tusa ai, i sina vaega e mafai ai ona fesoasoani i le fuaina o le tuaoi o si o matou itumalo, e aofia uma ai lava le itumalo atoa i lea fesoasoani.

Ona pau lena o ni manaoga foi po o ni motugaafa a lou nei sui usufono, ae lagolagoina atoatoa le Supplementary o le tatou Paketi. Ma le faaaloalo tele lava, faafetai i lau Afioga i le Fofoga Fetalai, faamanuia mai le Atua i le tatou Fonotaga.

FOFOGA FETALAI: Malo faafetai. Ua maea le saunoaga a le sui usufono mamalu. O le mea sili o lea ua manino le faafofoga mai a le Kapeneta aemaise o le Taitai o le Malo e tusa ai o lou finagalo faaalia, e a le itumalo ma ana atinae i mea o lo o manaomia, e momoli atu ai le faafetai a le Nofoa.

Ma o lo o oli mai le itumalo o Vaisigano Nu. 2. Ona o lea ua tatou taunuu i le tatou malologa masani. E faamalulu atu i le sui usufono mamalu, o le a e saunoa pe a toe taliu mai i le tatou malologa masani.

Ou te faasilasila atu o le a faataatiaese Taulumaga a le Fono Aoaio Faitulafono mo lana malologa masani.

Na faataatiaese Taulumaga a le Fono Aoao Faitulafono i le itula e 10:38 i le taeao mo lana malologa masani ma toe faaauau i le itula e 11:16 i le taeao.

Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe (Nu.1) 2017/2018.

FOFOGA FETALAI: Ou te faasilasila atu ua toe amatalia nei Taulumaga ma Galuega a le Fono Aoao Faitulafono.

Malo faafetai o lele ua matu i fau le faasiliga malosi e faaauau ai le tatou galuega e tusa ai lo tatou valaauina ae a le tapuaiga a Samoa.

E faia le malologa o lo o faapena ona tulai mai le sui usufono mo Vaisigano Nu.2, ma ou te tapa ma le faaaloalo lau Afioga i le sui usufono mamalu e tulai mai e te saunoa e tusa ai o le tatou Tala Faaopoopo o le Tupe.

Afioga TAPULESATELE MAUTENI TAMASONE METULI II ESERA (Vaisigano Nu.2): E tulai atu ma lou ava tele i lenei taeao i le Fonotaga a le Fono Aoao Faitulafono o le Palemene o Samoa.

FOFOGA FETALAI: Ou te faamalulu atu lava i le saunoaga a le sui usufono mamalu, mo le silafia e i ai le lafo a le Afioga i le Taitai o le Malo e fia faatuina muamua ae tatou te le i faagasolo i saunoaga faalauaitete a sui usufono mamalu e uiga i le tatou galuega, ona e i ai le manatu e toe faaopoopo tatou taimi galulue o lenei aso.

Ou te tapa ma le faaaloalo lau Afioga i le Taitai o le Malo.

LAFO MO LE SUIA O ITULA FONO

Susuga Hon TUILA EPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai, ou te tulai atu ma le faaaloalo e faatu le lafo, *Ina ia suia itula Fono o tatou Fonotaga, e faapea e 9:00 i le taeao i le ta o le 1:00 i le aoauli malolo, ia ona toe amatalia foi lea i le afiafi nei i le ta o le 7:00 faauma i le 11:00 i le po. O nei itula e tumau seia oo ina pasia le tatou Tala Faaopoopo o le Tupe.*

Faalua e le Sui Palemia, Minisita mo Pisinisi, Alamanuia ma Leipa ma le Minisita mo Faatoaga ma Faigafaiva.

Na faamaonia le lafo ma tulai ai ua toe faaopoopo itula o Fonotaga seia pasia le Tala Faaopoopo o le Tupe.

Na toe faaauau Felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2017/2018.

FOFOGA FETALAI: Ou te tapa lau Afioga i le sui usufono mamalu mo Vaisigano Nu.2 e tulai mai e faaauau le saunoaga.

Afioga TAPULESATELE MAUTENI TAMASONE METULI II ESERA: Faafetai i lau Afioga i le Fofoga Fetalai. E tulai atu ma lou faaaloalo tele e faafeiloai atu i lau Afioga i le Fofoga Fetalai, faafetai mo lou avanoa, e i ai foi le talitonuga ua sao i alo le faasiliga malosi o le Maota nei.

Ou te faafeiloai atu i lena itu o le Maota o le Fono Aoaofaitulafono o le Palemene o Samoa, le Afioga i le Taitai lau Afioga i le Palemia, Sui Palemia, Kapeneta, e le gata i lea o Minisita Lagolago. E faafeiloai atu foi i lena itu o le Maota, ou te faafeiloai atu i le Ofisa o le Fono, Faauluuluga o Matagaluega ma Faalapotopotoga faapea foi ia le Afaasalalau, aemaise e o lo o aofia i lena aso i le tatou Fonotaga.

E faatulou atu i le tapuaiga a Samoa i Lana Afioga Mamalu, O Le Ao o le Malo ma le Masiofo, Sui o le Fono a Sui Tofia ma faletua, le paia o Samoa o lo o tapuaia o outou faiva o le a le oo i ai se tautalaga, aua o paia e le popo, o paia e tumau, ae tainane le faafofoga a le Afaigaluega paia a le Atua o lo o faanonomanu aua se lumanai mo Samoa ma ona tagata. Ou te faafeiloai atu foi i le tapuaiga a si ou itumalo o Vaisigano Nu.2.

Lau Afioga i le Fofoga Fetalai ma le mamalu o le Fono i lena aso, o le faaauau atu ia sina faamatalaga puupuu e uiga i le Tulafono Tau Faaofi o le Faatatauina o Tupe Faaopoopo (Nu.1) 2017/2018. E lagolagoina ma faafetaia e lena itumalo fuafuaga a le Malo i manaoga faaopoopo e pei ona i lumamea nei, ma e manatu foi o lo o faagasolo lava ma taumulimuli i ni sini ma le anavatau, o le Agavaa Tutusa ma le Talafeagai. Ma e avatu ai le faamalo i le Minisita o Tupe ma le Pulega ma le Matagaluega i le lagolagoina o atinae ma manaoga talafeagai aua le gasologa lelei o galuega a le Malo. Ma ou te faapea atu, e lagolagoina e lena sui usufono le Tulafono Tau Faaofi o le Faatatauina o Tupe Faaopoopo (Nu.1) 2017/2018 e pei ona i ai, mo polokalame fuafuaina a ia Matagaluega e valu, ma e faafetai ai foi galuega maeaea a le Komiti o Tupe Maua ma Tupe Totogi.

Lau Afioga i le Fofoga Fetalai, e i ai sina vaega itiiti lea e fia faatauaina i le faatulai mai o le Lipoti e pei ona i ai nei. O le tulaga lea o lo o aliali lava le faafitauli lea o le faatumuina o avanoa faigaluega, ma e o le tele lava o Matagaluega o lo o aliali mai pea ia lea faafitauli. O nai faafitauli lea i le vaai i ai e pei o le tulaga lava o le totogi amata, faatasi ai ma le totogi maualalo po o le minimum wage, pei o le tulaga ia o lo o aliali mai pea i le vaai i ai pei e mafua ai ia le tulaga lea i avanoa faigaluega e faigata ona faatumu. O lesi tulaga e ese mai i le totogi, o le tulaga lea i tomai moomia. E i ai lava le manatu, o nai vaega ia i le maitau lava o le mafuaaga tonu lea e ala ai ona faigata ona faatumu ia avanoa nei, aua e pei lava ona talanoa atu e le tasi se Matagaluega po o se Faalapotopotoga e tulai mai ai lena faafitauli. E pei foi ona taua e nisi foi sui usufono le tulaga muamua lea i le minimum wage po o le totogi maualalo. E i ai lava le manatu foi lea mo le silasila a le tatou Malo, pe le i lata mai se taimi e taumafai ai e faatino lea tulaga. O le tulaga lea i tomai moomia, atonu e sili atu ona faigofie le faatinoina lava o lea foi ua maualuga foi le tulaga ua i ai tatou aoaoga, e le gata i aoga ia maualuluga le Iunivesite. E i ai le manatu ia galulue faatasi foi lea ma aoga ia maualuluga ma Iunivesite ma ia taumafai ia aoaoina lava ia maua tomai moomia lea i totonu o le atunuu. Aua e pei o le molimau atu lena o lea foi ua toe faailoa mai e le Komiti o Tupe Maua ma Tupe Totogi o lea lava e aliali mai le faafitauli lea. E pei o le tulaga lena e avatu ai se manatu.

Lau Afioga i le Fofoga Fetalai, ona agai mai lea i nai vaega ia aua lava le tau atiaeina o le tatou atunuu. O le mea muamua e momoli atu lau faafetai i le Minisita mo Faatoaga ma Faigafaiva, o lo o maitauina lava le taumafai ai ma le Matagaluega i le atiaeina o aiga, i nuu ma itumalo. Sa talanoa foi i tulaga lava ia o le amataga mai o le tatou Paeaiga o le taumafai lea e atiaeina faatoaga ma faigafaiva ua maitauina foi e lau Afioga sa i ai foi le tatou feiloaiga ma le Minisita sa i ai talu ai nei ona o tulaga lava o le faanaunautaiga e pei o nai vaega ia e mafuli i ai le taumafaiga o nai tupe maua ma le tamaoaiga o nai aiga, i le tele o nai aiga o le tatou atunuu. Ia, atonu o lea lava ua faasolosolo faigofie, o lena ua e tu mai i matagiolo, o le avatu lava le lagolago foi ma le taumafai atu aua le atiaeina o nai o tatou aiga aemaise o itumalo. Ae o le a i ai si au fautuaga laitiiti o le a ave ai lau tatalo i le Minisita mo Galuega ae moomia ai lau fesoasoani ma lau lagolago.

Ona see mai lea e momoli atu le faafetai i lau Afioga i le Minisita mo Galuega, Felauaiga ma Atinae Eseeese e pei ona i ai o nai talosaga foi a si ou itumalo sa taumafai atu ai. E pei o nei foi talosaga e le o se mea fou, ua leva foi tausaga o taumafai. o le agaga lava ina ia mautu tulaga uma aua le sailia ma le tapenapena o le tamaoaiga o nai o tatou itumalo.

O le tulaga muamua lau Afioga i le Minisita, o le fia faaopoopo atu lea o le faafetai pei ona i ai muamua foi i le tatou Fonotaga o le tulaga lea i le viliina o le vai i Sataua. Sa ou fia tulai atu lava ina ua tele foi finagalo sa agai i lea tulaga i le vai magalo ma le vai oona lea e tau soo, ae ou te musu lava e ese foi lota ita talitonuga i le vai sualua lea. Ma e i ai foi lo au manatu lava, e moni lava o lena ua i ai saienitisi o mea tau vai i lena itu, ae i ai foi nai malamalamaaga lava sa maua foi i ia foi aso. Aua o le tulaga i vai ia, o le itumalo lava lea ua masani lava i le vai lea, na soifua mai lava o le vai e sualua, a o le talitonuga foi sa faaauau ai e oo mai i le taimi nei, e tele mea ia e i totonu o le vai lea ingredience e aoga mo le soifua maloloina. E pei o le tulaga o lea sa faaauau mai ai le faaaogaina o le vai. E leai foi ni chlorine sa faaaogaina i la aso, ae sa taumafa lava le vai sualua lea, e moni lava foi sa maua nai tane i na aso, ae pei o le vai lava lea sa faaaoga e le itumalo. Ae i ai le talitonuga lau Afioga e, talosia ia e uma atu le isi valu vaiaso lea e lumanai a ua maea le galuega o le tatou vai, aua o le vai lea ua viliina i Sataua, o le talitonuga o le Ofisa i latou suesuega o le vai magalo, ae i ai foi manatu o le tele foi o nisi o le itumalo, e i ai lava le faailoga fesili, ona o le talitonuga o le malifa i sisifo e magalo, lea e i ai nuu ia o le Alataua, a o le malifa i sasae e sualua. Ae talosia ia le faamoemoe o lau Afioga o le tatou vai o le a mautinoa e taumamafa ai le itumalo e magalo.

O le isi vaega lau Afioga i le Minisita, faafetai foi ona o fuafuaga e faatatau i moli o le alatele. E talitonu lava e asiasi atu lava i le tatou galuega i le motu i Savaii, ona o le taumafai e faatino le tulaga lea. O lau faafetai o lea ua faatino nai moli, ae o lo o i ai lava le talosaga. Afai ua fai pe faatolu pe faafa atonu o le a toe maua ai ni nai moli mo si o matou itumalo. E ese le manaia o le i ai o moli ia. E moni lava foi o lea e i ai le fuafuaga i le faaupuga lea o moli o le aualatele main road, ae i ai le manatu ona o le tele o aiga o si o matou foi itumalo o le agai lea i tua. O auala sa tau o auala galue e pei ua nofoilo le tele o auala ia e le tele o aiga.

O le isi tulaga lau Afioga e tatalo atu ai, o le tulaga lea, na o se manatu e avatu i le tulaga lea i le tele o auala, o le mea lava sa i ai e tau o auala galue lea ua nofoia, ua faaleagaina le tele o auala ia, e amata atu lava i Papa, alu atu

i Vaivaimuli alu atu i Fagasa. O le talosaga foi e pei ona avatu. E momoli atu lava le faafetai ona o le talatalanoa foi ma pulenuu foi o le isi o matou nuu, o lena ua i ai le finagalo ma le faamoemoe o lau Afioga ma le Matagaluega e faatino atu le isi auala lea. Ae o le talosaga pe ono mafai ona i ai se fuafuaga foi lea e a pe a taumafai pe mafai ona faaoga se masini foi lea pe tai faafa i le tausaga po o se tulaga faapena e teu ai foi lea le auala. E pei o le tulaga lena e faatalosaga atu ai, a o faatalitalia le vaega lea pe toe faatina pe leai.

O le manumanuga lava o nai tagata feoai aemaise foi o taavale e le faigofie nei auala mo ia tulaga. Lau Afioga o le auala lea e agai i le tatou vai lea e tapena le vaimagalo lea e tapena ua matua faaletonu lava. E pei o le tulaga lena e toe tatalo atu ai, ae maualuga lava le faafetai atu ona o fuafuaga o i ai ma galuega ua faatino mo si o matou itumalo.

Ona oo mai lea o se faamatalaga i si manaoga mulimuli lea lau Afioga i le Minisita mo Galuega, o le tulaga foi lea e pei ona ou talanoa atu mo le fuafuaga lava lea mo a tatou faatoaga. E ai lou manatu foi lea e talosaga atu pe mafai ona silasila i le tulaga lea i mea ia o pikiapu ma tamai loli. O le tulaga lea e i ai i faatoaga, o le faigata ia o mea nei o tamai taavale, leaga e talanoa la o faatoaga lea e i le main road. A outou silasila i ai, o le tulaga lena o lo o i ai, ou te le talanoa atu o uta i le talaloa aua e faigata ona afea, a o lea ou te molimau atu, e moomia lava pikiapu ma tamai loli aua le faatinoina o faatoaga ia. E matua le mafai lava ona alu se tamai taavale i uta. O le tele o isi aso e atu nai aiga faatali mai le agai i uta i fanua ia o le matou itumalo, o le mamao lava o le mea e oo i ai le taxi, faatu i ina, ma nai tamai vans laiti foi nei. A lau mai se uta, o tamai taavale na.

FOFOGA FETALAI: Toe lua minute o le sui usufono.

Afioga TAPULESATELE MAUTENI TAMASONE METULI II ESERA: O lau tatalo lau Afioga i le Minisita, pe le mafai ona toe silasila i ai. I lau lava maitau e le afaina le toe tuu i tua o le tausaga mo pikiapu ma ni tamai loli, e faaagaaga lava i tulaga ia mo tatou faatoaga. E pei o lau tatalo atu lena, ou te auai pe afai e finagalo lau Afioga i le tulaga lea, e leai se afaina i isi tulaga lea i te i ua i ai se popolega. Ia, o le tulaga lena o lenei lava taumafaiga ma manaoga, leaga o si ou itumalo e pei o le mea lava lea e tua i ai, o nai faatoaga. E leai lava se isi mea, o le toatele lava o matou e agai i uta, agai i tai i tulaga foi tau faigafaiva. Ia leaga o lea ua tau puupuu lou taimi, se i faaoo atu lava si faamatalaga laitiiti lea.

Faafetai atu i lau Afioga i le Minisita mo le Soifua Maloloina. Ia o lea foi ua faafofoga lava pei ona i ai foi le tatou faatalanoaga i le tulaga lea o le tuufatasi o le MOH ma le NHS. E i ai lava le talitonuga o le fuafuaga lena pei ona saunoa foi ma finagalo foi sa faaalua i le tulaga e manuia ai le tausiga o le soifua maloloina i si o tatou atunuu. Faafetai foi o lea ua amanaia le faaogaina o tatou komiti i tua i nuu taitasi, komiti a tina. E i ai lava le talitonuga o le fuafuaga lea ua e saunoa foi, o finagalo foi sa faaalua, o le ala lea e manuia ai le tausiga o le soifua maloloina o si o tatou atunuu. Faafetai foi o lea ua toe amanaia le toe faaogaina o tatou komiti i tua komiti a tina i nuu taitasi. E i ai foi le talitonuga o le faamoemoega foi lena o lo o taumafai i ai le Minisita mo Tina ma Tamaitai, Atinaea o Nuu, Afioga ma Agafesootai aemaise foi le Pulega, ona o tulaga lava ia e maopoopo lelei ai le tausiga o le soifua maloloina i o tatou tagata.

E tatalo atu lau Afioga i le Minisita ona o le tulaga lea i fomai. E toe faaleo atu pea le tulaga lea. I le taimi nei i le taitasi, se i e alofa afai lava e laitiiti tuu atu i le tolu aso, ae ua laitiiti tele le tasi o le aso. E leaga foi le toe tuu atu i le uma o le tuufaatasiga, ae tele mai nisi faafitauli i nai nei vaiaso o lumanai. O le tulaga lea lau Afioga.

Lau Afioga i le Fofoga Fetalai, na o sina toe minute lava lea e faauma atu ai sina vaega lea faamolemole.

FOFOGA FETALAI: O le fautuaga, e manaia ona í ioe, leaga o lea e toso lau saunoaga ae manumanu i lou taimi. E a oe i saunoa ae manumanu atu le Fofoga Fetalai i lou taimi. Ae alofa ia e faauma mai nisi o mea o totoe.

Afioga TAPULESATELE MAUTENI TAMASONE METULI II ESERA: E leai, e i ai lava le talitonuga e tuu avanoa lava lau Afioga.

FOFOGA FETALAI: Faamaea mai le mea lena e totoe o lau saunoaga.

Afioga TAPULESATELE MAUTENI TAMASONE METULI II ESERA: Faafetai atu i lau Afioga i le Minisita mo Aoga, Taaloga ma Aganuu, o lea foi ua saunoa i ai nisi o sui usufono i le tulaga lava lea i lenei foi tausaga i le faaiuga o suega o le tausaga na tea atu nei, e maeu foi le lelei ma le agai i luma.

O le tulaga i Matata Eseese e pei ona saunoa i ai se tasi o sui usufono, e faapena foi le lagolago atu. E i ai lava le manatu i te i ua tatou faataua le isi pito ae faaletonu le pito lea, a o le pito lea o lea e gaoioi ai, so o se atunuu lava ma so o se atinae, o le pito lea e gaoioi ai. Le mamalu o le Fono i lenei taeao, e fau ai le kesi lena e fau ai le nofoa lena. E pei o le tulaga lena, e faaleotele ai lau speaker lena. O le tulaga lena e tatalo atu ai, po o le a lava se fuafuaga mo le Matata Eseese, ia iloga ona tulai mai. Ia maua o tatou tomiai nei tatou te manaomia aua le faagaoioiga o nai o tatou tagata ma lo tatou atunuu. Na ona faailoa atu, o lea lava e taumafai lo matou faleaoga i Papa mo le matou talosaga ina ia toe faaleleia lo matou faleaoga lea a le Tulagalua. Ia, leaga o lea ua faauma mai lou taimi, se i taatia isi vaega ia mo le agai i luma.

E momoli atu le faafetai ma le faamalo i lena itu o le Maota, i galuega o lo o fitaituga i ai lau Afioga i le Palemia ma le Kapeneta aemaise Minisita Lagolago. Manaia foi le galulue fesoasoani atu ma le lagolago a lenei itu. Ia manuia si ou itumalo, nai ou nuu o Papa, Vaivaimuli ma Fagasa, Faafeagaiga faletua ma aiga, aemaise le loaloa o nai o matou aiga i le alofa o le Atua. Soifua ma ia manuia le Fono Aoaio Faitulafono le Maota o Samoa.

FOFOGA FETALAI: Malo faafetai saunoa i lau Afioga i le sui usufono mamalu mo Vaisigano Nu.2. Ae faatofamalie foi, e manatu lava i lo tatou vatapui ma le avafatafata ae manumanu foi ia tatou galuega ma Tulafono Tumau. O le mea lea ou te faamalulu atu ai i le finagalo o lau Afioga i le sui usufono.

Ma ua avanoa foi le tatou lumamea o le Fono Aoaio mo se isi sui usufono e tulai mai mo se saunoaga. Pe i ai foi se sui usufono o lea itu, tatou felafai e manaia foi lea.

Ia, ua tuuoli mai le toa o Faleata i lea itu o Faleata Sisifo.

Tofa LEALAILEPULE RIMONI AIAFI (Faleata Sisifo): Faafetai i lau Afioga i le Fofoga Fetalai, e le sese lau faamatalaga. E amata atu i Faleata Sisifo seia oo i Faleata Sasae ma alu atu ai lava i le Vaimauga atoa.

Ia, e faatalofa i le Fonousu a Samoa i lau Afioga i le Fofoga Fetalai, lau Afioga i le Palemia, le paia i le Kapeneta aemaise foi sui usufono mamalu o lea vaega, e amata mai sui usufono matutua, o le sui usufono mo Falealupo ma le sui usufono mo Palauli le Falefa ua matutua tele, le paia o lena Vaega, aemaise le faafofogaaga a Samoa i Lana Afioga Mamalu, O Le Ao o le Malo, le tapuaiga a le Aufaigaluega a le Atua, ma le loaloa o Samoa i ona tulaga faalupe, tulou lava. Faafetai foi i sui usufono mamalu o le Malo, Taitai o le Malo, Faauluulugai .

Afioga Hon Faumuina Tiatia Faaolatane Liuga: Lau Afioga i le Fofoga Fetalai....

FOFOGA FETALAI: Malie lava lau Afioga i le sui usufono mamalu, se i tulai mai pe i ai se mea uaí .

Afioga Hon Faumuina Tiatia Faaolatane Liuga: E leai, o le gagana e tatau ona faasao. E le fuaina le matua i tausaga, e fua le matua i mafaufauga, fai mai ni mafaufauga e aoga. Faafetai.

Tofa LEALAILEPULE RIMONI AIAFI: Faafetai lava lau Afioga. O lea faatoa amata le lauga. Ua uma ona tuusaunua lena vaega ma tuu mai e le Afioga i le Taitai o le Malo, a lauga loa Faumuina tu i luga e tali.

Muamua e momoli lau faafetai i le Malo, Palemia ma i latou uma i galuega sa faatino i lea tausaga. Malo le galulue faafetai mo galuega faatino. E avatu le faamanuiaga a lena itumalo mo galuega o lena tausaga ua amatalia. O le a mulimuli se faamatalaga i le itumalo ma nai mea laiti a lena itumalo e fia....ae o le a amata i le Tala o le Tupe, faafetai i le Tala Faatatau o le Tupe. Amuia i tatou o lo o tatou omai e faasoasoa le tupe, ae tatou te le o omai e tau suesue po o fea e aumai ai ni a tatou tupe. Ae faafetai o lo o lava le faasoa aua le tatou atunuu ma le atinaeina o Samoa i aso faipea.

Muamua, faafetai i le Afioga i le Minisita mo Falepuipui ma Auaunaga Toefuataina i le galuega tele o lo o faatino nei i le siitiaina o le tatou falepuipui i le tulaga o lo o i ai. Ua talafeagai lena vaitau ona ua faatupulaia lo tatou atunuu, ma ua tusa ua fetui lava le taimi e siitia ai. Sa ou alu ou asiati, ua matagofie le tulaga o i ai ma talafeagai, aemaise o le saogalemu o si ou itumalo. E pei o le tele o taimi e sosola ai i tua pagota, e tele lava ina afaina i latou o lo o nonofo i lena itumalo. Ua uma foi ona ou oo ma talatalanoa ma nisi, ave i ai le malu i puega, onosai o lea o le a siitia le falepuipui atonu o le a faaitiitia ai lea vaega. O lea foi ua uma ona avatu fautuaga a le Malo ma le toatele o sui usufono i lea vaega i le sosola soo o pagota, atonu o le a mafai ona faaitiitia ma le toe tupu pe a siitia le falepuipui i tulaga o i ai. Ae o le mea ua tatau ona toe tagai i ai lau Afioga i le Minisita ma i latou o lo o faafoeina le falepuipui, afai ua talafeagai le toe aumai o le potu numeru 9 lea e masani ona i ai ua tatau ona toe aumai, leaga e le fetui mo i latou o lo o i le Toese o lo o faamaoni e tuli o latou faasalaga, e afaina ai lo latou taimi ma o latou avanoa ia i latou toaitiiti o lo o faia lea mea. Aua tatou te tuuulafo tele i manatu ia mai fafo ma faalapotopotoga ia e omai e

aumai nisi manatu sese, ae fai e i tatou le mea e talafeagai lava ma lo tatou siosiomaga ma lo tatou atunuu. Aua e le o latou ia e afatia ma afaina, o o tatou tagata. Afai e silasila atu lau Afioga o le mea e tatau ona faatino, e fautuaina lau Afioga e toe faatino.

Ona oo mai lea o lou manatu i tulaga tau aitalafu, nonogatupe e pei o le upu lea e matagofie. O au nei e sefulu tausaga o ou i le Itu Agai. A outou tilotilo ma outou tagatagai i Faamaumauga, uma ou tausaga e sefulu i le Itu Agai, ou te le i lauga tete e nonogatupe, e le mafai. O lau fautuaga foi lea i le tele o sui usufono faatoa afifio mai i le Palemene pe a matou talanoa, ða e finagalo e atiae lou itumalo, aloalo ese ma mea neiö. O tupe lava ia o lea e maua i totonu o Samoa, e lava ma totoe e faafoe ai lo tatou atunuu i aso faipea pe afai tatou te mananao, na o le tatou aai, malolo, tafafao. Ae afai loa e mananao ma finagalo i tatou e atinae le atunuu, e le mafai le mafai ona alo ese mai i vaega nei. Ma o se atunuu vaivai tele pe afai latou te le faaaogaina tatau avanoa o lo o tuuina mai e atunuu tetele, faalapotopotoga tetele a le lalolagi o lo o maua mai ai nonogatupe e mama tului. O lea la leaga ua tiga lava lou mafaufau i le mea lea na tupu e le i leva atu nei, i le aiaina fua e nisi o atunuu o nonogatupe a le Pasefika. A o le mea e lelei ai, ua toe nofo i latou ma toe faalauaitele mai le lisi o atunuu o le Pasefika ma a latou aitalafu i le Malo o Saina, o le mea matautia e tele atu aitalafu a le tele o atunuu o le Pasefika i lo Samoa. O lona uiga, o atunuu nei, o la e faaoga tatau le avanoa ua tuuina mai e malo tetele nei, e aumai ai tupe e atinae ai o latou atunuu, e le gata i le mama o tului, ae umi taimi e totogi ai.

O lea la, i lau lava fautuaga, aua o le galuega lea a tatou o sui usufono, tatou te talatalanoa i o tatou itumalo, faamalamalama i ai mafuaaga. Aua e uma, amata mai ananafi ma lenei aso ma taeao seia uma la tatou Fonotaga, o le mea lava lea e auga i ai o outou finagalo ma o tatou manatu, o le atinaeina o tatou itumalo ma le atunuu. A le mafai la ona faaoga tatau e i tatou vaega nei, e le mafai foi ona atiae lo tatou atunuu i le mea e tatau ona i ai.

I le Soifua Maloloina, faafetai i lau Afioga i le Minisita ma le tulaga ua i ai le vaai mamao i totonu o le Matagaluega. E tasi lava le auga, o le auga autu o fesuiaiga ia na fai nei, Reforms a le Malo, o le tuumavaevaeina o Matagaluega, e tasi lava le manulauti, ia lelei le auaunaga, ia siitia le tulaga o auaunaga faatino i totonu o Matagaluega. Afai ua uma ona fai ma tagai atu e le o ausia le manulauti na faatino ai, faafetai toe faafoi, toe fai o lea ua lava le iloa ma le experience mai mea na tutupu e toe fotuai ai le Matagaluega i le agai i luma. A vaai atu foi i le Dialysis ia ua tatau ona toe aumai i totonu, aumai i totonu, fai faa-Division ma le tele o Matagaluega e tasi. A o le vaega lea ou te fia talanoa i ai, aua sa mai si ou atalii i le falemai i le vaitaimi sa matou i ai e atoa le vaiaso, ma sa ou vaavaai i ai i le tele o mea nei, atonu o se taimi talatalanoa atu i lau Afioga, e tele lava nai vaega e tatau ona faaleleia. Ma e le tatau foi ona i ai ni o tatou alofaga, e tele tupe o lo o avatu e le Malo, e tele tupe o lo o avanoa mai faalapotopotoga mai fafo, ma le tele o fesoasoani, e tele lava i le alu i le Soifua Maloloina. O lona uiga a faaoga tonu ma faaoga tatau, e leai se tulaga e ono faaletonu ai le auaunaga lautele. E talitonu o le a tapuaia le tulaga ua toe agai nei i ai le Soifua Maloloina.

A o le vaega lea o fuamoia, leaga o lea sa matou talanoa ma le Afioga i le Minisita mo Pisinisi ma Alamanuia, ua lua nei, ua fai si tele o masina, ua fai ma faaititia le supply, e le masani ai. Ae faapea mai, ona o le finagalo o le Matagaluega, le mea lea mai le tolusefulu aso i le onosefulu aso. Ia manatua

foi, o fuamoā lea e ai ai tatou Samoa, e tausami ai Tutuila, e onosefulu aso uma lava. Aua o vaa lava ia mai Amerika, sau i Samoa ma o atu i Tutuila. E tatau ona toe tagatagai lau Afioga i le vaega lea e toe fetuunai. E lua lava Aso Sa o sosoo aua e pau lena o le aso e ai fuamoā ai lo matou aiga, e le maua se fuamoā. E le pepelo lau tala iinei i Vaitele atoa. E taua i lou manatu le atinae o tatou faatoaga ma atinae i totonu o Samoa, e tatau ona ave i ai le faamuamua. Ae afai e le mafai e i latou ona faamalieina le maketi, e tatau ona toe tagatagai i vaega ma itu nei. Ia lava le taimi, e toe ave i tua i nisi tagata, ae toe tagai lelei i le vaega lea. Aua e le gata ina leai, ae a toe maua mai, ua matua taugata tele. Ua le mafai ai foi ona ausia le finagalo o le Malo ma i tatou uma i lea foi vaega.

O le isi vaega, vaeane le faafofogaaga a Samoa ma le Maota Fono, o mea nei o siusiupipi. Ua tatau ona fai se faaiuga mautu, pe toe tatala pe leai. O lea ua maua faasoloatoa, ae o le mea e maitauina ua aumai faa black market, ua aumai i lalo ua aumai faanana e nisi. Ua tatau afai o le Soifua Maloloina lea e faia le faaiuga o lenei mataupu, lau Afioga i lou lava talitonuga, tatala e aumai, tatala e aumai o lea e fai le tatou polokalame foi lea i tua e aoao i tagata le kukaina ma le faavelaina o lenei taumafa, aumai e faaoga aua o lea ua maua lautele. Aua o lea e fesili mai nisi tagata, po o fea e maua ai, a o lea lava e faatau lautele i le taulaga. E tatau ona fai i ai se faaiuga a lau Afioga ma le Matagaluega o Tiute.

Lau Afioga i le Minisita mo Tupe Maua, e 90% o mea i tatou fale i Samoa o mea mai fafo i le taimi nei. Tagai lau Afioga i le Price Control Board, o i ina le key atoa o le mea leni i au tupe maua. Aua afai e maua uma lava i tai i le Tiute le tau o mea ia e declare i tai i le Customs. Afai o se mea mai fafo, o lo o declare lona tau e maualalo, o lona uiga la a oo i le taimi e toe faatauina atu ai, e tatau ona maualalo ifo i le tau lea. A o lona uiga o lea e faamaualalo i tai le tiute ina ia maualalo le tiute e totogi, ona toe aumai lea toe tuu i luga le tau i fafo, ona tele lea o le tupe a tatou e maua ma le talafeagai. Aua o le mea lea e lipoti mai, e talitonu ua oo atu foi i lau Afioga. E i ai nisi o Kamupani tetele o latou e agent i totonu o isi products ia e aumai, ae o lea e le mafai ona tatou talitonuina e latou e taugata atu le tau lea latou te faatauina ai ona o le tau talafeagai lea i lo tau o la e faatau ai e isi tagata, lea e aumai faanana mai mea ia i totonu. O lona uiga, o lau fautuaga i lau Afioga, se i toe tagai lelei i le Price Control Board i le latou matafaioi lea, aua o se mea talafeagai tele ona faatino.

Ona oo mai lea i le Minisita mo Aoga, Taaloga ma Aganuu, e le tau selu atu i lau Afioga. Na pau lava le mea ou te fiafia ai i le Afioga i le Minisita, o le tausaga na tea nei, sa afio mai le Minisita e faatoese leaga e tele le faaletonu sa i ai i le tausaga na tea nei, o suega, liki i tua suega, leaga le faiga o maka. Ae a le tausaga nei? O lea ua matua... Faafetai. E avatu le faafetai ma le faamalo ua aoga lau ote. Leaga o Sola e pei e ataata ae ote, o le matua matautia lava o le tagata, faafetai. Ia manatua lau Afioga sa amata loa le tatou Paeāiga ua e Minisita, avatu loa ma lau tusi i se aoga i i Vaitele e le po se lilo i le faatupulaia o tupulaga i Vaitele. Ua tatau ona tagai le Malo i se isi aoga ma se isi college maualuga ona ua matua faatupulaia tele ma ua moomia tele. E tasi lava le college i Faleata, le Faleata College. E tasi le kolisi ae feed mai ai le toatele o primary schools lea e i ai nei i Faleata atoa, o Faleula ma Falelauniu, o lona uiga lau Afioga, se i tagai ane i lea vaega, o lena e ia te oe lau tusi, afai ua pefua, ou te ou agofie e toe tusi atu foi. A o se mea taua tele

e fautuaina lau Afioga, e le o po se lilo ia Samoa i le fusuaga tele lea e fai nei ia Mati, o se avanoa e le aumaua. Ia manatua foi i Cardiff lea na faalauiloa ai Samoa i le lakapi, lea foi la ua toe fai ai le fusuaga lenei. Ia tatou tapuaia ia. O lau tuualalo, a maua sou avanoa, afio i o e le toe maua ni avanoa tetele faapenei i le lumanai. Na pau le mea, aua e te toe alu i totonu e faasalalau mai le fusuaga, e faamaepaepa pea oe ma tapuai ia manuia le fusuaga. O au, ma lou faamaoni lava, ua uma ona totogi ma pasese ma lou toalua ma te o e tapuai le fusuaga. Ou fai atu, e le toe maua ni avanoa faapenei. O le fusi ua fusu ai se alo o Samoa i le Fusi o le Lalolagi, ae ta o ta matamata, i te i ua faaletonu Parker, ae o la e ou te fesoasoani e ono ou oso i totonu, e faaea le pologa o Samoa.

Ona ou oo mai lea i fanua ia tau Samoa. O le mea lea e ofo ai lou loto, e pei o tagata ia e tetee i fanua tau Samoa, pei na o latou tagata ia e alolofa ia Samoa, pei na o latou tagata ia e mananao e puipui fanua tau Samoa. A o tatou, tatou te mananao e faatau tiiai fanua tau Samoa ma aveese atu. O le mea lena e ofo ai lou mafaufau. O le Tulafono lea na aumai a o ou i totonu o le Itu Agai, e leai se vaega o le Tulafono ou te le i faitauina ma ou lauga ai foi. Ou te le o malamalama la i ai i le vaega lea. Aua o Samoa, a tatou tagai ia Samoa lava ia, e ese ai lava Samoa mai le tele o atunuu, ma ou te le iloa foi pe i ai se isi atunuu e tutusa ma Samoa i le tele o fanua lea e umia e ona tagata, 80% e oo mai lava i le aso ma le agai i le lumanai. O le lisiina foi o fanua e le o se mea foi faatoa fai ananafi, ua leva ona fai mai nei mea o le lisiina o fanua tau Samoa. O le lisiina o le lisi ae le mafai ona aafia ai fanua. Ia o lau talanoa leaga o le mea e tataua ona tatou malamalama ai ma faafofoga i ai sa fesiligia foi e lou itumalo po o le a tonu le tonu o le mea lenei. Po ua i ai sou malamalamaga i nei mea? Ou fai atu, o le matuai ou malamalama lava, o Tulafono a uma ona faitau mai luma e tau i tua ona faausese lea ae faitau mai tua e tau i luma. E leai se vaega ou te le malamalama ai lau Afioga i le Fofoga Fetalai. A o le mea lea tatou te talanoa ai, e faamalalamalama i o tatou itumalo le saogalemu o fanua o le atunuu.

Ona ou oo mai lea lau Afioga i le vaega lea o lea ua agai i ai le tatou atunuu, mea lea o fesoataiga faaonaponei, atonu o se taimi ona saunoa atu lea o le Afioga i le Minisita e faalauiloa faalauaitetele atu mea nei, ae le mafai ona toe alofia e Samoa. E le mafai ona toe alo Samoa mai le tulaga ua agai i ai le lalolagi, e le mafai foi ona tatou mulimuli mai tua, e tataua ona tatou agai i luma. Ma o se vaega taua tele mo le faatinoina o le atinae o le atunuu vaega nei pe a taunuu mai. Ae o le auga o lou manatu, sa ma auai ma le Afioga i le Minisita i se fonu tele a le lalolagi ia Tesema, o le fonu lenei sa auai uma lava tagata e pulea mea o initaneti i le lalolagi atoa, mai le apple, o le arc ma vaega uma lava. O le auga la o le lauga a le tamaloa lea e pule i le apple na faaautu i ai lana lauga fai mai lana tala, e le o faapopoleina au i masini ua fia pei o ni tagata, a o le mea lea ua atugalua ai lou loto o tagata ua fia pei o ni masini, people wanted to be machines ma ua lusi atoa ai le humanity side faaletagata i nei mea. E le o po se lilo i le mea lea e tupu i le tatou atunuu i le faaoga sese e tagata nei o mea nei e faamalepe ai ma faavevesi ai totonu o le tatou Malo ma mea e fai. A o le faigofie ia o le tali, faigofie. Na o le fai atu lava o le Malo, taeao tape le initaneti, pe, ae tatou te le o faia. Leaga e le aumaia mea vaivai faapea e faatino ai vaega lelei o lenei auaunaga. A o le mea ua tataua ona fai. O mea nei o whistle blowers ma tagata nei e lagalaga mea faapea i totonu o atunuu, e maua uma lava i atunuu temokarasi, ae le mafai

ona tatou tetea, e mafai, ae fai i se auala talafeagai ma faaofigofie. Ae le o taofia foi e le Malo tagata mai le puipuiga o tagata o lo o faia ni amio piopio i totonu o le Malo. E leai. A lea na saunoa le Taitai o le Malo, a i ai se mea o e silafia ma e ilo, a tau, alu i tai i le fale o le Malo, alu i tai i le faamasinoga e ave i ai. O le mea lena e moomia ae aua tatou te faia nei uiga le popoi ma le le mafaufau vaeane lau Afioga i le Fofoga Fetalai ma faaogasese ai mea na aumai mo le ola lelei ma le ola lautele ma le ola agai i luma o tagata o le atunuu leaga e le logolelei. O le tatou atunuu, e tatau ona tatou mitamita, ua fia tausaga ua ova ma le 30 tausaga o lelei le faafoega o le Malo ma agai i luma. Ma i le vaai mai fafo, o lo o viia tatou i le tulaga o mea e fai. E leai se atunuu e selau pasene, a o le nofo saogalemu o tagata, o lo o viia mai le tele o atunuu. Ae o le fed lea ua i ai, o le faafitauli lea ua i ai, o totonu lava o tatou tagata. O tatou tagata. E le gata i tagata ia e nonofo iinei, a o tagata mai fafo.

O lau fautuaga i lau Afioga i le Palemia aemaise o outou o le Kapeneta, ia tatou galulue faatasi, aua aua lava ne i tatou amanaia le pola motu i toa, aua tatou te faalogo i ai. A o lau Afioga i le Minisita mo Fesootaiga, ua leva na tatau ona sue, aumai se i sue, ave i le faamasinoga, leaga e le lelei, e le matagofie, o tatou o le atunuu faavae i le Atua, lea ua tatou laulauvivilu ai nei. Ua tatau foi i le tusiina o tatou Tulafono, ua tatau ona tatou tilotilo atoa lava i le faataatiaga o Tulafono, leaga e atagia ai le mea ua tatou autasi i ai ma pasia e le tatou Palemene, o Samoa o le atunuu Faavae i le Atua, o le Atunuu Kerisiano.

Lau Afioga i le Fofoga Fetalai, ona ou oo mai lea i manaoga laiti lava ia o lou itumalo, e le tele. E mai lava i le amataga, na amata loa le Paeaiga fai au tusi e avatu e tau atu i ai. Ua uma le tusi, uma foi ona ou asia ma fonu, a o lea la se i faaleo atu ia, aua o le upu a le Tusi, o le tuitui e tatala. Ae afai loa e fiu e tuitui ae le tatala maia, ia tui loa.

Lau Afioga i le Minisia mo Galuega, you are my brother, lau Afioga i le Papaliitele. Ia manatua foi na ta talanoa avatu lau tusi i lau Afioga, matou o atu ma nisi o lou itumalo i si ou nuu o Vaigaga i le tatou pa lea na talosaga mai i le amataga. Na tali mai foi lau Afioga ma faamalie mai, o lea lava la ou te onosai. O lea ua tagai lau Afioga ma le Malo, o lea ua o ifo le nuu faatino le pa ia latou lava tupe, ae le tatau ai i lou talitonuga. Ia taatia faapena lau Afioga, na pau lava lena o le mea na ou alu atu soo ai i lau Afioga, ae le o au o se tagata tagisa. Se i toe tagai ane i ai lau Afioga i le vaega lea, faamolemole lava. E le gata i le pa lea, a o auala lea e i Falelauniu. Lea sa maua i lau saunoaga i le tausaga na tea nei ua pasia o le a faatino, ia faamolemole lava. Ua matua faatupulaia le tele o tagata i totonu o lea vaega o le atunuu. Ma e pei ona outou silafia, o totonu o Faleata Sisifo, na o i lava le vaega o Samoa atoa o lo o faatupulaia lona faitauaofai i tausaga taitasi. E faaititia uma mai Samoa atoa ona omai lea faaopopo i luga i i i totonu o le itumalo lena, e tatau la ona fuafua i ai le faatinoga o tatou atinae ma le faaaloalo lava.

O le mea lea

FOFOGA FETALAI: Tulai mai lau Afioga i le Minisita mo Galuega, Felauaiga ma Atinae Eseese.

Susuga Hon Papaliitele Niko Lee Hang: Lau Afioga i le Fofoga Fetalai, e le fia faalavelave i le saunoaga matagofie a lou uso faapelepele o

Lealailepule. E moni le saunoaga a le sui usufono ona o le tulaga lea o le oo faafia atu i lou ofisa ua tiga foi ou mata ma avatu foi lana tusi talosaga i le mataupu lava lea. O le mea na tupu i le tulaga o le pa lea i Vaigaga, na tapena lava le galuega o le faiga o le auala lea o le four lane ma aafia ai ma le faiga o le pa lea. A o le tulaga sa i ai le tupe sa mafai ona fai ai, o le tulaga foi lea o le chain link, ae peitai ane ua tapena e le afioaga ia le pasima lea le white wall lea e tau lava i o i le faleaoga, a o lea la e taatia lava aua o lea o le a tapena le isi vaega o le auala pe maua se isi tupe faaopoopo aua ou te talitonu o lea ua faatino e le tou ekalesia ma le afioaga le tulaga o le auala lea. Ae uma ona ta talanoa i le mataupu lea ma e malie mai ai e faauma. Ana faapea na i ai se tupe na totoe mai le galuega lea o le four lanes, semanu e faataunuu ai le talosaga a lau Afioga i le sui usufono. Ae pei o le tulaga lena, e le o faapefua lau talosaga o la e iila i luga o le kesi lau talosaga, a o le mea lau Afioga e fia faasao, o le amataga o le lauga a lau uo, e pei ua atagia mai ai o le a pule mai fua ia i le Vaimauga. Aua e te fia pule mai fua i le Vaimauga, e gata lava lau pule i Faleata. Ma lou faaloalo lava. Faafetai.

FOFOGA FETALAI: Malo. Ia se i vaai po o se va faa-Vaimauga ma Faleata e mafua ai ona le faia lau pa. Tulai maia lau Afioga e faaauau le saunoaga.

Tofa LEALAILEPULE RIMONI AIAFI: Faafetai lava i lau Afioga i le Minisita. E leai o si au uo ua leva ona ma mafuta. E leai, e faamalulu atu ia Vaimauga, o Vaimauga ma Faleata o le auso, o le fale Tuamasaga, ae ou te musu e sosoo atu leaga o lea e afio mai Loau, ia tailo. Ae faafetai i lau Afioga o le mea sili o lo o faafofoga mai le itumalo e leai e le o malolo o lo o lagalaga pea i lea vaega. Ae le tele lava ni mea na ou tu atu ai.

Lau Afioga i le Minisita mo Faatoaga, ou te talitonu o le tali lava o le talo lea o le mea o le chips. O le tolu tausaga talu ai, sa pasia foi e le matou Komiti o Tupe i ina i le SROS, na aumai ai la mea ia o taro chips e faaaisa. Ia e oo mai lava i le aso se i vagana ua fai e tagata faleaiga nei. Ae ana encourage, faamalosia, ailoga e toe aumaia ni pateta ia mai fafo ae faaoga lelei le tatou talo ma le ulu e fai ai tatou chips ia. Aua o le mea lea e fiafia ai tagata e tausasami ai, a o lou talitonuga, e sili mamao lava le tatou talo pe a faatino nai lo mea ia.

O le mea lea o le manu ainiu lau Afioga, ua matua faatupulaia tele a o le laau lea aupito sili ona aoga ia tatou, se i tagai ane i ai lau Afioga, faamalo i lou tulai mai, ua tele mea lelei o lo o faapena ona fai.

Ua tele foi saunoaga i le vaalele a le tatou Malo, ma e avatu foi lau faamalo i le Malo aemaise lava le Afioga i le Minisita i lenei vaega, e leai lava se isi o tatou e le manao e fai se tatou vaalele, ma e le o se finagalo fou foi po o se manatu fou i le Palemene lenei, sa faapea foi ona lauga ai sui usufono i le Palemene talu ai, ae o se atinae e maaleale tele lona faatinoina, e maaleale tele, ma e le gau i ni tai afe po o se tai \$100,000 e gau lava i le tai miliona. O lau fautuaga i lau Afioga i le Minisita, lototele e fai, ae tatau ona closely monitor, e tatau ona matua vaai tino i ai ina ia tuu mai pea i le Kapeneta le faasologa, ma ua tatau foi ona ia outou se faasologa faataitai mai aso ma masina ua tuana'i talu ona faatino, o i ina tou te silafia ai ma tatou iloa ai fua le agai o le atinae lea.

FOFOGA FETALAI: Malie le sui usufono mamalu se i tuu atu le avanoa i le faauilavea a le Minisita mo Pisinisi, Alamanuia ma Leipa.

Afioga Hon Lautafi Fio Selafi Purcell (Minisita mo Pisinisi, Alamanuia ma Leipa): Lau Afioga i le Fofoga Fetalai, ou te le iloa pe toe fia minute o le sui usufono lea e totoe, ae ou te iloa o le sui usufono lea e ese le fiafia e faalogologo i lona ia lava siufofoga. Ae e sili lou tulai atu e tau faapuupu nisi nisi vaega o ana saunoaga. I le vaega lea i le vaalele, na ona ou faapea atu, taatia mai ua leva ona tilotilo i ai le Kapeneta ma le Malo faapea le Matagaluega o lo o faafoea tatou vaalele, e le o se atinae e soona fai, o atinae o lena e te saunoa mai e maaleale, e faapena uma lava manatu ua ala ai ona fau le vaalele lenei ma toe tulai mai ai le miti a lo tatou Malo. O mea ia e te fai mai ai e tatau ona monitor ma mea uma na, se o la ua leva ona tapena e le Matagaluega e avatu i le Kapeneta leaga o lea faatoa amata, o lea faatoa lua masina. Na ona ou faapena atu lau Afioga, leaga pei o lea e manatu le sui usufono, ia a le faaalua mai lava e ia e leai ni mea faapea o faia, ae ua leva ona fai. Ma lou faaaloalo.

FOFOGA FETALAI: Malo faafetai. Ia e faamalie atu i le sui usufono.

Tofa LEALAILEPULE RIMONI AIAFI: Lau Afioga i le Fofoga Fetalai, o le mea a tatou fonu, e faaali lava le finagalo o le sui usufono ia, o lea e avatu lau fautuaga, afai o fai, faafetai, leaga a goto le tatou sa, e le na o outou, o matou ia e tapuaia outou faiva, ae afai o fai, ia faafetai. Ma afai e te le fia faalogo i lou leo, faafetai lava, leaga o au e tele ina faatilitilo i ai le Afioga i le Fofoga Fetalai ou te pese, ou te pese ona e fia faalogologo i lou leo i taimi uma, e le na o au, o lou toalua ma lau fanau ma lou aiga, e fia faalogo i lou leo. A i ai le tagata e le fia faafofoga i lou leo, faamalulu atu, ae onosai, onosai.

O le tatou numera lea i le 911, ia na ou faamalulu, e faamalulu atu foi i lau Afioga i le sui usufono mo Gagaemauga Nu.2, ua leai se taimi ta te feiloai ai, ae avatu faamaluluga i lau Afioga ma faalototele, leaga o le maota lava lea na muamua lava mu i le po o le tausaga fou, vaeane lau Afioga, o le vaiaso foi lea na tatala ai le tatou numera lea o le 911. Ia ua uma ona ou talanoa i lou uso a Minisita, e tele lava le faaletonu, ona ou faamalulu lea i nai tagata nei, malie o lea faatoa amata i le aso le tatou numera lea. Ae mo le agai i luma, ia onosai, o lea ua faafofoga mai le Matagaluega e tele lava le galuega e tatau ona fai i le tatou numera lea leaga o lea e feteenai solo tagata ma le o lelei, aua e ono afaina ai le Malo aua a vili vili mai nei le o atu, ia vaai i fale na o le tai 10 agai i le 5 minute e oso atu ai a o lea e....ia fai atu ai foi, aua e le o se mea nei o mea fou, ae alofagia mo le agai o le tatou numera lea e taua.

FOFOGA FETALAI: Toe lua minute o le sui usufono, fai atu ai foi.

Tofa LEALAILEPULE RIMONI AIAFI: Ia a lailoa lava lau Afioga e tau aumai na minute e lua, ua lava ma totoe lau lauga i le faafofoga a Faumui o lea la ua tick A++. Ia Samoa manuia la outou tapuaiga, lau Afioga i le Palemia ma le Kapeneta, aua tou te maaleale gofie ma faapea mai o lea itu e taotaomia matou, e leai e le sao lea saunoaga, ma e leai foi se faatonuga i lenei itu, aua ne i faia ni lauga i nisi mea, aua e le tatau, le tatau ona tupu. O

le mea e faaali finagalo o le tatou Fono fai faatasi o sui usufono mamalu o itumalo. Afai ua faamanuaina outou finagalo i se tuualalo, ia e faamalulu atu, o le tatou sa e fautele. Ia alo ia manuia outou faiva i lenei tausaga, e le faigofie le tatou faigamalaga. Lau Afioga i le Fofoga Fetalai faamalo le onosai, alofagia e le Atua ia uma le Paeaiga lenei ma se isi Paeaiga, o e malosi lava. Le itumalo, ia tatou feiloai pea i luga o le initaneti, ma le faaaloalo lava, soifua.

FOFOGA FETALAI: Malo. Ua silafaafofoga foi le Palemene ma faafofoga foi Samoa i le saunoaga a le sui usufono mo Faleata Sisifo. Malo faafetai, malo saunoa.

Tulai mai se isi sui usufono e fia saunoa. Manaia foi le felafuai, o lea faatoa tasi le sui usufono, e ui lava o le Minisita Lagolago ae...O lea ua tulai mai le sui usufono mo Gagaemauga Nu.2 o le tama matua o lea itu o le Maota.

Tofa Hon FAASOOTAULOA PATI TAULAPAPA (Gagaemauga Nu.2): E muamua ona momoli atu le agaga faafetai i lau Afioga i le Fofoga Fetalai. Ia tatou faafetaia le Atua e lelei lava o Ia i mea uma lava, faafetai i le Taitai o le Malo, le Sui Taitai ma le Aiga Kapeneta. O Samoa ua uma ona tofi, ua taoto a o se alaoo, o ou maualuluga ma ou mamalu pe ou te oo i ai pe leai, ia ou te le toe tautala i ai i lea vaega. A lape le gagana, ia sema i le Atua sou finagalo, ae faafetai i le Atua o lea ua taitai mai lo outou soifua ma so matou ola e amataina galuega o lenei tausaga.

E momoli atu le agaga faafetai ina ne i te i ua galo i le toeaina ona ua galogalo foi mea, o le tausaga ua mavae mo le galuega lelei sa aga atu i ai lau Afioga i le Taitai, Sui Taitai ma le aiga Kapeneta i mea lelei sa feagai ma le tatou Malo. O a fatia ua sola ma taimi ua alu, o a foi ni lape, e tatou te talitonu o lo o soifua le Atua faamagalo, ia maua e i tatou le Faigamalo o sui usufono mamalu o itumalo taitasi le agaga faamagalo, faamagalo le tasi i le tasi, aua tatou te fetauai e leai sa tatou mea e maua ai. O Samoa ua uma ona aoaoina i tatou i so o se tulaga, e le gata i le faakerisiano, a o tu ma aga tatou te masani ai. O le mea lea e momoli atu ai le agaga faafetai tele i lau Afioga i le Taitai ma le Aiga Kapeneta mo fatia ua alu i lea vaitau ma lea vaitau.

A o lenei itula o le aso, ua leva lava ona siisii atu lo ta lima e le umi foi se talitonuga i se sao o lenei itumalo. Pau lava le mea e taumolimoli atu ai se sao o lenei itumalo aua le Tala Faaopoopo o le Tupe. Sa mafaufau lava le toeaina pe ou te lauga pe leai, ou te talitonu tele i le aiga Kapeneta i lo latou....i mea e faagalo ai ae sili le faamanatu.

Lou itumalo, ua leva o lea o le a alu le 20 tausaga e le i faia se mea e tasi, o lea, o lea ua ou talosaga atu ai i le Minisita mo Galuega, ia o auala o lenei itumalo e na o le lua auala lava o Saleaula i Savaii ma Saleaula i Salamumu i inei, o lea ou te toe tatalo atu ma le agaga faaaloalo, po o le a sou finagalo pe tefa le tauala, se i manatu ifo isi ou itumalo. O lea ua uma foi ona avatu tusi tusitusia ma avatu foi musumusuga tuu taliga, ae leai ou te le....afai ua leai ni tupe a lo tatou Malo, o lea ua avatu le lagolago a lenei itumalo i le tatou Tala Faaopoopo o le Tupe. Ou te talitonu foi e tele foi faalagona na i ai i le tele o sui usufono, o le nuu lenei i Saleaula i Savaii, o le tele ia o faaeleeleaga la e i ai ae faigata ona lau ane le talo i tai, o tua Lava e mamao. E pau lava lau talosaga, a mafai lava e na ona sua o le auala tau i le mea lea e lau mai ai le talo, aua le faataina, ae na ona sua lava faalaulelei le auala. O lou nuu i tua i

Saleaula Salamumu, ia o Turisi la e i ai e matautia aua e tele tagata maimoa ma tagata e fia matamata, ae sa talosaga atu foi i nai loli e fesoasoani i le itumalo mo le fia faalaualeiina o le auala, na ona sua lava, a ua leai se tai a na ona sua lava. E pei o se agaga lea e tuuina atu ai i lau Afioga i le Minisita mo Galuega ina ia alofagia si o matou nuu. Ou te le iloa foi pe alu alu o lea ua ou faalogo atu ua maua lou malosi fou toe sau foi i lea sefulu tausaga, o le mea lea ua ou tatalo atu ai, o au ou te toe fia sau i le isi sefulu tausaga lea ua maua lou malosi ua aumai e le Atua o le ala ou tu foi lea i luga e fai sau lauga, leaga ou te iloina lava ou te toe sau. O le mea lea ou te talosaga atu ai ma lou agaga faaaloalo, ina ia faapena ona faatagisia atu e lou itumalo ina ia alofagia.

O le Matagaluega lea o le Soifua Maloloina, ou te le iloa pe na faapefea ona fuafua le falemai lea i lou itumalo, sa tu i le aai i le mea e ola ai tagata, a o le mea lea ua i ai, ua ave i le togavao e oo atu mai ua....O le mea lea e talosaga atu ai i lau Afioga, toe silasila i ai po o le a lou finagalo, o la e i ai le Lava lele o lo matou nuu o le va o au ma Mauga, a leai se mea e fai ai se falemai, o la e tele le Lava lena o lea ua ofo atu e lo matou nuu e fai ai se tatou falemai lelei.

O le Afioga i le Minisita mo Faalapotopotoga mo Tagata Tafafao Maimoa Mai Fafao, na ona ou faalogo atu lava i le latou Matagaluega fai mai, manaia tele le tou nuu lale pe ana...o le mea lea ou te talosaga atu ai i lau Afioga, pe le tefa le tauala, o le a se mea e matagofie se Matagaluega e fau ai i lo matou nuu la e i tai, e fai fua lava, o le nuu la e i ai e o uma i ai ia tagata tafafao maimoa mai fafo e fia nonofo ai. O lea ou te talosaga atu ai i lau Afioga i le Minisita, ia alofagia sou finagalo ae faapena ona i ai se tulaga o le faamoemoe. E talitonu lava lou sui usufono, e ala lava ona...ou te le tauanauina leaga o lea ou te iloa le tulaga, a o lou lava lena agaga na faatu, o lea ua ou talitonu, ia outou alofagia ou te toe fia sau i le Faiga Palota lea o le a fai nei pe a fai mea ia ou te faia, e le mafai lava ona ou le sau. O lea tou te silasila i le tulaga foi, e le taumateina. O lea ou te tatalo atu ai, a outou faia mea ia, o lena e faafofoga mai lou itumalo, e le mafai ona...o le mea lea e tatalo atu ai.

Faafetai tele lava i le Minisita mo Falepuipui, o lea ua ou vaai atu o lea ua...e tasi lea mea ou te talosaga atu ai i lo tatou atunuu, ua uma ona faatulaga ia nofoaga nei i tai i Tanumalala i faatoaga o manupapalagi, o lea o le a toe uma lava tagata faifaatoaga e le i toe faia lava se mea, o la e fia feinu lava manu ma...a o lea ana le o atu nei le falepuipui o la ua amata ona gaoioi mai le Malo e fai vai, ou te talanoa atu ai i lau Afioga i le Minisita, a fai le vai o le falepuipui ae ua leva ona fia fai ni matou fale mautu, ma tuu mai la mea e matou te nonofo ai, e le faapea o le a ave ma turisi ae pule ai outou. O le mea lena e talosaga atu ai, ia outou alofagia i tulaga e tatou te felagolagomai i tulaga o mea faapena, a o nisi mea, pei na o le pau lena o le agaga e tuuina atu. Ou te momoli atu le agaga faafetai, o lou itumalo, o lea ua outou faafofoga mai, sa ou le manatu lava e fai se finauga, ae na ou talanoa atu foi ia outou, ou te le alu atu i le filifiliga o le tatou palota ua ou matua, ia ae outou fai mai lava, ia o lea la ua ou toe malosi, o lea ua ou valaau atu, ia tapena aua tou te faatamala o lea o le a ou tapena lelei mo le isi Faiga Palota lea e le iloa pe maua ai se tatou Minisita po o le Palemia foi ia o mea lava faapena. Ma lou faaaloalo, ia manuia le Fono.

FOFOGA FETALAI: Malo, faafetai saunoa faaleaumatutua, ua faafofoga mai foi le itumalo, ia faamalo le lauga, ua maua le ai aua le itumalo i le latou tapuaiga.

Ia se i tulai mai foi se isi sui usufono e saunoa e faamaea ai lo tatou taimi galulue i lenei aoauli.

Ia tulai maia lau Afioga i le Sui Fofoga Fetalai le sui usufono mo Gagaemauga Nu.3.

Tofa NAFOITOA TALAIMANU KETI: Lau Afioga i le Fofoga Fetalai, ua ou manatu o se laolao lelei lenei e sosoo ai le fau ma le fau Gagaemauga Nu.2, ia e faapea foi se lauga a Gagaemauga Nu.3. E le alu loa lo matou vaa e ao ona afe atu, Saleaula, malo le lauga. O le ta nonofo ai, lea sa ou faatalitali lava po o le a lou taimi, leaga o le vanonofo ai o Matautu ma Saleaula o oe o le matua, vaeatu le Maota, lea ua maea le malelega a le matua, o le a sosoo lo ta vaa.

Manatu lau Afioga i le Fofoga Fetalai ou te le toe paoina le paia sausaugata o le Maota, ou te talitonu o lele ua maea ona paniniu ma faalauatea i ona vanu tifato ma ona aau loloto, e le toe vaea i sa matou upu, tulou le gagana. Ae ao lava ina matou toe oo atu i le tapuaiga a le atunuu, e afua ai ona see manuia le faiva o le Palemene. Matou te faatalofa atu i le tapuaiga a le atunuu ua po po le fala ma feula le mulila, faafofoga tapuai mai i maota ma laoa taitasi, e afua mai i Matautu na aai seia paia le lualoto, ou te talitonu o lo o mau pea le toovae. Malo tapuai, malo le faafogafoga mai, aemaise si ou itumalo e afua mai i Matautu fanuatanu, ma aso faatau, siliga ma fale faamaoi, Malae ma Tulaga, seia Maotamaa. Ae a lou malae i Falefagamalo, e tu ai le tootoo o Matautu, aua le va i fafo ma le va i fale, le Paia aua le Aiga Sa Peseta ma le latou Maopu, nofo a Usoalii le Faleiva ma le igoa tau o Matautu o oe o le Faamalugaomalo. Malo le tapuai, o lena tausaga i galuega sa feagai ai, lea ua aulia lenei tausaga fou 2018, ua manuia ona o a outou tatalo. Faapea foi paia o le afaigaluega o lo tatou itumalo, matou te momoli atu le faafetai a o maua so matou laolao i le Maota. Faafetai i le tatalo mai a o fautuaga foi aua le agai i luma o le tofi faipule o le tatou itumalo, o la outou pule lea.

Manatu o lea o le a sui tonu le mata o le niu, le ala o le matou tulai, e tusa o le Tala Faatatau Faaopoopo o le Tupe 2017/2018, faatuaituai so matou tulai e matamata ma vaavaai totoa, i afuaga na afua ai na faufau le Tala Faatatau Faaopoopo o le Tupe. A o upu foi o lena tausaga e leai se tatou Tala Faatatau Faaopoopo o le Tupe, peitai i le vaavaai totoa i ai, ua manatu ai lenei itumalo ma lenei usufono, talia aloaia le Tala Faatatau Faaopoopo o le Tupe. Ua ou vaavaai i le tulaga o le faagasologa mai o le afuaga na tuuina mai ai le \$24.4 miliona e faaopoopo aua galuega o Ianuari seia oo ia Iuni, ma lona faavasegaga atoa ai ma lona faatupeina, momoli le faafetai i lau Afioga i le Minisita o Tupe. E faapea foi le Afioga i le Pule Sili ma le matagaluega, i le faafoefoaina ma le vaavaaiga i le tulaga e faatupe ai lenei Tala o le Tupe, ia aua le faaauauina o galuega a le Malo ma ona atinae. Malo le galulue, faafetai le faamaninoina o tulaga uma e pei ona aumai ai le Tala o le Tupe.

Pau a lea o si mea e fia oo i ai se matou faamatalaga lau Afioga i le Minisita o Tupe, i le tulaga o le faamuamua, i le tulaga o le ave o le faamuamua i le faaso. O le agaga lena o lea e tau avatu ai i le tulaga lautele, se i toe silasila ane. Taua e nisi o sui mamalu e pei ona maea i le taeao ua sola, e i ai lava le agaga o lo o talanoaina pea i le tele o aso. O le agaga i le vaai i le

aufaigaluega i le silasila i le aufaigaluega i le tulaga o totogi, tulaga o totogi, iloa atinae. O le agaga lea lea e tau avatu ai se tuualalo, le tulaga o le tomai faapitoa. O le vaavaai i le agai mai o le tulaga i le Komiti Faapalemene, agai mai o matagaluega ma faalapopotoga tumaoti a le Malo, o lea e atagia ai le faafitauli e pei ona taua e isi. Faafitauli ua afua ona ua le ausia se matatia, e pei ona fesiligia ai, o le tali ua le mafai ona faatumu avanoa ia i tulaga o lo o i ai totogi i tomai faapitoa. E pei o le mea lea e tau avatu ai se fautuaga i lau Afioga i le Minisita o Tupe, i le tulaga i le faatumuina o avanoa ina ia ausia ai matatia o lo o finagalo ai le Malo.

O le mea lea e taulape ai ia tali na tuuina mai i Komiti Faapalemene, ona o le faasoa i Tala o le Tupe, e pei ona avatu ai se tuualalo i le faataotoga mai i le Tala Faaopoopo Faatatau o le Tupe i lenei tausaga. E faapena foi ona oo atu sa matou faamatalaga lau Afioga i le tulaga o le minimum hourly rate, o lo o taoto ai nei lo tatou Malo, ia ma auaunaga aemaise lava lalo i le vaega lea o casual_workers ma vaega foi ia e totogi vaiaso ma vaega togiaso. Lea foi e faafofoga mai le Minisita o Pisinisi ma Alamanuia, ou te talitonu o le avanoa lelei lea e tuu atu ai se lagona o lenei itumalo sei toe silasila ane i ai, pe le ua agavaa i le taimi nei fuafua i lau vaavaai atu i tulaga o lo o faataoto mai ai ia surplus o tupe maua, pe le ua tataua ea ona toe silasila i le siitia i luga i le tulaga o le totogi mauualalo o le itula tagata faigaluega.

O le mea lea e avatu ai sa matou tuualalo i lau Afioga i le Minisita e fito tonu i ai ia le faamoemoe lea, pe le ua oo i le taimi e pei lava ona ou fai atu i le tele o aso. E pei o nai faasea ia ma atugaluga o le atunuu, aua o le tatou tiute lea o le faailoa ma talanoa ma faasoa i le tulaga o le le gafatia ai e le tele o aiga vaivai e tasi le tagata faigaluega, ia a o la e totogi i le totogi mauualalo lea aua le tauatinaeina e le gata i totonu lava o aiga i fanau aoga, a o le ekalesia ia ma mea fai a aiga. O lea e toe faamanatu ai, o na i ina le tofa, o i na le moe ma le uta....

Afioga Hon Faumuina Tiatia Faaolatane Liuga: Lau Afioga i le Fofoga Fetalai....

FOFOGA FETALAI: Ia, se i tulai mai le sui usufono mo Palauli le Falefa.

Afioga Hon Faumuina Tiatia Faaolatane Liuga: Lau Afioga i le Fofoga Fetalai ona o au o le sui usufono o le Komiti o Tupe Maua ma Tupe Totogi, i tulaga lea i le atugaluga o le Afioga i le sui usufono mamalu po o le Afioga i le Sui Fofoga Fetalai, lea na fesiligia ai totogi o poto faapitoa.

O le matafaioi tonu lea e feagai ma le Faauluuluga o le Matagaluega ma le Division o le Human Resource ai i totonu o matagaluega. O le fuaina o totogi o galuega, e fua i le range o galuega, ma tools e faaoga e fua ai galuega. O lona uiga, o i ina e fua i ai, totogi o poto faapitoa.

I le tulaga o le minimum wage, o le pito lea i lalo, ae pule le employer, i le alu i luga, e leai se tapulaa o le alu i luga. E manuia le finagalo, ae a fua loa la e tuu i luga e le tatou Malo le minimum wage, o lona uiga, e i ai foi tagata o le a le maua ni galuega. Aua e tasi lava le mea e tua i ai tagata e ona galuega, o le faalaititi o le aufaigaluega. Tasi la lea vala, afai la o lea o le a raise le bottom part, e i ai tagata o le a le faigaluega, aua o le a tua foi tagata e ona galuega i le aveesea o nisi o le aufaigaluega ma lou faaloalo lava.

FOFOGA FETALAI: Malo, faafetai, faafetai i le sui usufono o le Komiti o Tupe Maua.

Tofa NAFOITOA TALAIMANU KETI: Faafetai i le faaalua o le manatu o le sui usufono mamalu, leai e le po Malae i le talanoa, leaga o la foi e faatino nai auaunaga faapea. O le ala lea o le molimoli atu o le talosaga ma faailo. E saolele lava le saunoaga a le sui mamalu e pei ona faalavelave nei, e pule le tagata faipisinisi i le alu i luga, sao e le sese, a o se faipisinisi lava ua tatou iloa uma lava ia mea, a o le agaga lea e tuu tuu atu i tafatafa, taitai e le Malo. O le tulaga lea e \$2.30, ia a o le tau o le soifuaga, o mea ia lea e tau molimoli atu. E sao i ina taimi, sao lelei, fua i le tamaoiga ma le faapaleniga, a o le agaga lea e tau molimoli atu, ua le oo ea i le taimi e toe silasila fua i lau vaai i mea ia, pepa ia e aumai o lipoti o tupe, tatalo atu, lea foi na saunoa le sui mamalu nei, i le latou foi Komiti, sa tele le surplus, leai masalo po o se \$29 miliona po o le a ea?

O le agaga lena o lea e tau avatu ai ni manatu vaivai o lenei itumalo se faamolemole toe silasila ane pe ua le talafeagai foi se isi a tuu atu i luga i le \$2.50 a ua i ai ni ai se i taufaapaleni tulaga uma. I le vaega maualalo, ia ma le vaega ogatotonu, ia ma le vaega i luga o le executive. O le agaga maualuga lena, a o la e i ina le tofa. O le tiute e taugologolo pea ma tuualalo, o i ina e foe ai le sa o Samoa.

Ia o nai manatu lautele e faaauau ai pea, o lea ua amata ona tatou toe talanoa i le tulaga o le fesuaiga o tatou faiga faavae, ia ma mea sa manatu lelei i lena taimi. A ua oo mai foi i lenei taimi, e pei la o le Ofisa o le Soifua Maloloina, lea foi o le a toe merge ma toe tuufaatasi, o le faamoemoe maualuga lava o le atunuu ia latou maua le auaunaga o lo o moomia o le agaga lena. A o na suiga uma, e i ai le atugaluga o lou sui, e o faatasi ai ma le aafiaga o lagona o nai tagata faigaluega. E pei lava ona saunoa le sui faatoa saunoa nei, e i ai ona afaina, o le a i ai foi tagata o le a le faigaluega ma le maua galuega. O nai afaina na o lea ou te manatu au ia, se i toe silasila aemaise lau Afioga i le Loia Sili, tulou, o lo o taoto mai,, i lau vaavaai i le aso o le aumaiga o le mataupu lenei, ma le suiga o le Tulafono, e pei o le agaga lena. Se i toe silasila i ai, i le tulaga o le afaina o le mamalu o le atunuu pe a oo ina fai suiga ia. E taua suiga, e tali foi e lou sui suiga, mo le mea sili, ae a i ai ma ni ona afaina, o le mea la lea e overlooked e tatou. E tataua la ona toe vaavaai ma toe silasila lelei, po o a ona afaina nei.

E i ai le manatu e toe fia faaleo ai ma le tulaga e ui lava ina ua pasi le Tulafono, e le toe oo i ai sau faamatalaga, a pasi le Tulafono e le toe oo i ai sa matou faamatalaga, a o ona afaina e pei la o le mataupu i le Matagaluega o Leoleo, lea ua o gugu lava for the benefit of the new law, the new ammendment, married couples, nofo le isi ae alu le isi. O le agaga na lea ou te fia avatu i luma, o le afaina o le o lava ma le leai o se mea. Sa tataua ona i ai nai faamanuiaga, i ai ni nai faamanuiaga fai le Tulafono pe afai o le lelei lea mo le agai i luma. Ioe i ai le sui mamalu, a o afaina mea ia ou te talanoa i ai, couplem cases, o mea e ono tutupu mai ai, sa tataua ona silasila i ai.

Ia afai o i ai ni nonogatupe, o le a faapefea ona totogi, o le toe suega o galuega aemaise lava i leoleo, toe o e toe saili nisi galuega, e pei lava e toe fai se visa e faamaonia sau solitulafono, a o lea,,

Afioga Hon Faumuina Tiatia Faaolatane Liuga: Lau Afioga i le Fofoga Fetalai....

FOFOGA FETALAI: Se i tulai mai le sui usufono mo Palauli le Falefa.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, e taua tele le mataupu lea e saunoa i ai le sui mamalu. I tulaga lava ia i mea o le aveesea po o le separating o separation initiated by employers, e le tatau ona alu ese fua se isi, e tatau ona maua faamanuiaga. Seivagana o se separation ua mafua i le le faamaoni, ma isi tulaga, ae o le taimi lava e ese e initiated by the employer, o le International Law, e le mafai, le mafai ona aveesea se tagata, e aunoa ma ni faamanuiaga, ma lou faaaloalo lava.

Afioga Peseta Vaifou Tevagaena (Faasaleleaga Nu.4): Lau Afioga i le Fofoga Fetalaiif .

FOFOGA FETALAI: Se i tulai mai le sui usufono mo Faasaleleaga Nu. 4.

Afioga Peseta Vaifou Tevagaena: Ou te tulai atu ma le faaaloalo lava i le saunoaga a le sui usufono mamalu ona e talu ai o lea e le o faatasi mai le Afioga i le Minisita, ae o au lea o le Sui Minisita. E le mafai la ona ou nofonono e tatau pea ona ou tali atu i le tulaga lea, ina ia manino le vaega lea.

O le masani lava lau Afioga a le matou Matagaluega, ona o le Tulafono ua uma ona taoto. E le o se Tulafono faatoa fai ananafi. O le Tulafono leni o le Tulafono faavae a le PSC po o lo tatou Malo. O le conflict i so o se mea i totonu o le Matagaluega. E le o se tulaga la faapea ua faafuaseia ona faia se faaiuga, ae pei lava foi ona ou fai atu, ua leva ona taoto lea tulafono. E le mafai ona galulue faatasi ni ulugalii po o fanau i totonu o se Matagaluega. O le agaga moni lena o lea na mafua ai ona faamalositia e le Afioga i le Minisita po o le Afioga i le Palemia le tulafono, i le tulaga lea. A o le tulaga lava ia i le tulafono ua leva, e le o se tulafono fou nei na fai e le Palemia po o le Minisita. E leai o le tulafono ua leva. E pei o le tulaga lea ua ou tulai atu ai e faamalalalama le tulafono. Ma lou faaaloalo lava.

FOFOGA FETALAI: Malo faafetai.

Tofa NAFOITOA TALAIMANU KETI: Faafetai i lau Afioga i le Fofoga Fetalai. Na ou manatu lava, o le Tulafono Tumau na o mea e fia faasao, a o lea ua tali mai le Sui Minisita o le Matagaluega, ia a o la e i ai lo outou taimi e le i oo i le taimi e tali ai, masalo o taeao. Ae e le afaina lea, e pule le Fofoga Fetalai.

O le a ou faasee ese. E le o le faamaninoga o le aveesea, o lea ua ou fai atu, talia le tulafono. A o mea ia e tatau ona silasila i ai, i ona afaina ia. O le vala lea o lea e talanoa atu ai ma le agaga faaaloalo. Ae ui i lea, o la e faafofoga mai le Afioga i le Loia Sili, leaga o le mea lea, e le o atoa foi. A married couples, defecto relation, o le mea lea o lea e taumafai atu ai, e le aoga ona implement ma enforce se tulafono e le o atoa. O le agaga lena, o le a tali mai taeao pe a maua se taimi.

O le a faasolo pea ina ne i maea lou taimi. Ona ou see mai lea i leif

FOFOGA FETALAI: E le o toe umi se taimi o le sui usufono.

Tofa NAFOITOA TALAIMANU KETI: E le o toe umi foi. Ona ou see mai lea lau Afioga i le Minisita mo Galuega, o lena ua i luma o le laulau, sa ou talosaga foi i le tausaga talu ai. O le auala galue i Avaio, e fa nuu ae tasi le auala galue. Se i faamau ane faamolemole. Ia faafetai. O Lelepa, Vaipouli ma Saleia e agai uma lava i le auala lea. E tolusefulu tausaga e le i toe lotea lava e oo mai i le aso. O le mea lea e toe tatalo atu ai ma le agaga faaaloalo i lau faasoa faa-matua alofa o lea ou te tatalo atu ai, se i faamolemole se i silasila i le auala galue lea. O la e i ai lou tusi valaaulia i le umusaga o le matou faleaoga fou, alu ai se asiasiga pe a tusa ma le tofa i lau Afioga.

O le Matagaluega o Aoga lau Afioga i le Minisita malo, faafetai ua tele le suiga. O moomooga ia o le atunuu. Matou te le selu atu, faamanuia le Atua i lau Afioga ma le Matagaluega. Na pau lava lea lau Afioga o la matou talosaga, maumau e, e vaavaai atu e tele tupe faasao lena e i ai a le Matagaluega, o Mati e umusa ai le faleaoga i le Laumoli. Toe pau lava si mea la e faaletonu ae faafetai o lea ua talia e lau Afioga le talosaga. Maumau e pe ana faapea e fai i luma mai o Mati semeamanu tou te afifio atu ua aulelei mea uma i le malae ma le faleaoga fou o la ua maea ona fai ma le hall. O le mea lea e toe tatalo atu ai i lau Afioga i lau faasoa, afai e te finagalo lava e tuu i le Tala o le Tupe i le tausaga fou. E na o le tuitui atu lava e pei ona saunoa nisi o sui usufono. E tuitui tuitui e iu lava ina tatala mai. E i ai lou talitonuga o lea ua ou vaavaai atu i le Matagaluega o Leoleo e tele tupe faasao lena ua i ai, a fai ma le malae i lenei vaitau, o le agaga lena.

Ua saunoa le matua le sui usufono mamalu mo Gagaemauga Nu 2 e uiga i le matou falemai lau Afioga i le Minisita o le Soifua Maloloina, ioe na sao i na taimi mafaufauga na ave ai i uta i Vaipouli. O le taimi nei, ua taugata le o i Vaipouli a o la e i totonu lava o lo matou itumalo o le o i Tuasivi ma le o i Safotu. O le agaga lena e faalua ai le talosaga a le tofa i le Matua ia Saleaula, se i toe silasila ane o le a se isi faiga, ua taugata le o i uta le o i Safotu e faapena Tuasivi. E \$3 le sau ai i le pasi i Tuasivi ae alu ai i uta i le togavao e \$5 le taxi i le alu \$5 le sau, faaopopo i ai ma le vaaiga o le fomai ma fualaa. E tatalo atu ai, e sao lava sa lelei foi fuafuaga i lena foi vaitau, e oo foi ina tautau le mau i le vaitaimi o galue i le Matagaluega o Leoleo i le Afioga i le Minisita o Leoleo i lena vaitau, leai taofi pea le ofisa o Leoleo i tai. E oo mai i le aso, o la e mafai ona access i ai le atunuu ma le itumalo i taimi uma. Mo mea o community services e tatau ona latalata ma faafaigofie i le atunuu ona agai i ai.

Ona ou oo mai lea i le Ofisa o Vaa i le agai lea o matou i Salafai. I le vaitau o aso fiafia, sa vaaia lava ma le loto alofa le mamalu o le atunuu. O lea e toe tatalo atu ai i lau Afioga e fitoitonu ma le vaega o vaa ma felauaiga i luga o le sami, pe le i oo i se taimi e tatau ona i ai se isi vaa mo i matou i Salafai i le tulaga i le feoaiga o le mamalu o le atunuu, e suisui tauau i le Lady Samoa III e pei ona fealuai nei i le va o Savaii ma Upolu nei.

O le talosaga se i toe silasila ane pe le i oo i se taimi e tatau ai, o lea ua matou maua, ua tapena le sa e sui ai le Salamasina, a o le vaa lea o Upolu ma Savaii, a outou silasila i ai, o le tulaga lava lena e stuck lava e uma ifo lava le aso o tutu ni taavale ma tagata i le uafu i Mulifanua faapena foi Salelologa. Faafetai foi i suiga ua i ai le uafu..

FOFOGA FETALAI: Malie le sui usufono, se i tulai mai le Minisita o Galuega.

Susuga Hon Papaliitele Niko Lee Hang: Lau Afioga i le Fofoga Fetalai, e faamalulu atu i le sui usufono mamalu ona ua faalavelavea lona taimi masalo foi ua maea lona taimi. O le tulaga lea leaga o le mea e fia faasao, e le o le Salamasina le igoa o le vaa, o le Lady Naomi. O le vaa la lea e tau sui nei pe a maua se fesoasoani a Iapani ona faafou lea o le Lady Naomi e aumai e fesoasoani i femalagaiga i Salafai. O le tapenaga lea o lea e fia faatino i se taimi vave lava.

FOFOGA FETALAI: Malo faafetai. Ou te fautuaina le sui usufono mamalu o lo o saunoa o lou uso, faaii maia le saunoaga ua tatou tulalata i le tatou taimi manava.

Tofa NAFOITOA TALAIMANU KETI: Ou te le tee i lau Afioga, a e saunoa lava o lena foi. Na pau o lea, Salafai, si o tatou motu faimea mafai, o lena ua outou faafofoga mai i fuafuaga a le Minisita. Faafetai tele i lau Afioga. Ia sa faita lava o se mea fou, ae afai lava o se mea tuai e lipea ma avatu matou te malaga ai i Savaii, o lau Afioga e te afio lava iinei ae aua foi ne i galo i lau Afioga, o lau Afioga Unasa mai Salafai. O le mea la lea na ona faamanatu atu i ou tafatafa, leai o oe lava o le tama mai Salafai, aua ne i aumaia ni mea second hand mo i matou i Salafai.

Ia ona faaii atu ai lea o se faamatalaga lau Afioga i le Fofoga Fetalai ma le paia o le Maota, afai ua sii se faamatalaga, ia, vaatele i lo outou finagalo, fale i le fale o le Atua. O le agaga lava ia o le sui usufono mamalu o le avatu ma tuitui atu aua le itumalo ma le atunuu. A o lena e i ina le uta a le faimea, o outou mama na i lenei tausaga, ia manuia le taitaiga o le sa tele o Samoa, manuia lau Afioga i le Nofoa, e faapea foi le faafofoga a le atunuu. Ia sui usufono mamalu o outou mama na.

Ia manuia le Fono.

FOFOGA FETALAI: Malo faafetai saunoa. Ua logo faa-Tutuila foi le faaiuga o le tatou galuega i lenei aoauli, ae a le tapuai mai a si ou itumalo aemaise foi o le Palemene. Malo le galulue, faafetai. E faapena lava tiute ma faiva o sui usufono mamalu o le Palemene e ala i sui usufono, ae faalogo lava, e tata logo a Masefau ma faalogo i le Kapeneta i finagalo manaomia o lea itumalo ma lea itumalo.

Ae talu ai o lea ua tatou toai taunuu i le taimi manava o lenei aoauli, ia ma ua faapena ona toe faamanatu atu le lafo e pei ona pasia, tatou te malolo nei i le itula e 1:00, ae tauaofia le Fono mamalu i le itula e 7:00 i le afiafi seia paia le itula e 11:00 i le po a nanei.

Ua tolopo le tatou galuega seia aulia le itula e 7:00 i le afiafi.

Na faataatiaese Taulumaga a le Fono Aoa o le itula e 1:00 i le aoauli.